


SWIHLOVO LESWI HANDZUKEKE

 A hi khongeleni. Hosi, ha pfumela sweswi. Hi pfumela eka N'wana wa Xikwembu, kutani, ha leswi, hi amukela Vutomi lebyi nga Heriki ha Yena. Sweswi hi hlengeletanile nakambe, e nhlikanhini lowu, kumbe e madyambyini lawa, eka xikhongelo xin'wana, hi ri eku tshembheni ka Wena eka Hungu ni leswi U nga ta hi byela swona vusiku lebyi. Hi pfumela Wena, Hosi, nakona hi rindzele Wena. Kutani U feru, "Lava va rindzelaka Hosi va ta nyikiwa matimba mantshwa; va ta haha kukotisa gama." Kutani ha khongela, Xikwembu, leswaku U ta hi nyika Matimba yalawa ya ku hahela ehenhla, vusiku lebyi, tani hiloko hi rindzela eka Wena.

² Ha Ku khensa hi vanhu lava, ni leswi va vulaka swona eka Wena ni leswi va vulaka swona eka mina. Ndza Ku khensa haswona, Tatana. Hi vona maribye ya nkoaka ya Wena. Kutani ndza khongela, Xikwembu, leswaku vusiku lebyi, leswaku U ta tisonakarisa hi Wena n'winyi hi ndlela leyi, eka vona, va ku lavaka ha yona. Loko ku ri ni lava vabyaka lahawani, i ngaku va nga hanyisiwa. Loko kuri niku kanakana emiehleketweni ya un'wana; yi rhabi, Hosi. Kutani ntsena u hi nyika Vukona bya Wena ni minkateko ya Wena, hikuva ha yi lava, Hosi. Hi Wena ku ringanela ka hina hinkwako. Kutani, ehandle ka Wena, a hi nga swikoti ku endla nchumu.

³ Hi khongela leswaku U ta amukela ku khensa ka hina eka hinkwaswo leswi U hi endleleke swona. EVitweni ra Yesu Kreste hi langutele emahlweni minkateko ya Wena. Amen.

Mi nga tshamisa.

⁴ Kutani, kunene, ntsena ka—ka titimela nyana vusiku bya Sonto lowu, lahawani, kutlula hilaha a kuri ha kona vusiku bya Sonto lowu nga hundza. Hi khensa vamakwerhu va hina lava tirheke hi ku tshembheka hi ku ngenisa leswi. Ndzi tiva vambirhi kumbe vanharhu va vona. Makwerhu Mike Egan, tani hiloko ndzi n'wi vona lahaya ndzhaku, nakona ndzi . . . Makwerhu Mike, na Makwerhu Sothmann, Makwerhu (ndza pfumela) Roy Roberson, na Makwerhu Woods, ni hinkwavo ka vona, ntsena a va ri lahawani va ri ku julukeni ka nyuku, a va ri eku ringeteni ka ku swi ngenisa leswaku hi nga ha kota ku kuma Hungu leri sweswi, kumbe namuntlha. Swingaleswi, ha khensa swinene.

⁵ Sweswi, Sonto lowu landzelaka ni mixo, loko Hosi yi swi rhandza, ndzi lava ku va ni xikhongelo xa ku hanyisa, swikhongelo swa vavabyi. Kutani hi ni kungu ra ku xi endla xikhongelo xa ku hanyisa, loko Hosi yi swi rhandza.

⁶ Ndzi xiyisisile, mixo lowu, leswaku ku ni nhulu ya swidukwana lahawani. Ndzi swi khongelerile. Kutani mina, loko ma ha ri eku khongeleni niku yimbelela, ndzi swi khongelerile swidukwana; kutani ka ha ri ni swin'wana swidukwana madyambu lawa. Swingaleswi, hi—hi pfumela leswaku Xikwembu xa hanyisa vavabyi. Swingaleswi ku ni vumbhoni lebyi kulu bya ku hanyisiwa exikarhini ka hina, ni misava hinkwayo, kutani ha swi khensa leswi.

⁷ Kutani ndzi ehleketa, Sonto lowu landzelaka, ndzi fanele ku va ekule nyana, kutani hi yime nkarhi wo leha eka ku dyondzisa ni ka Hungu, leswaku ndzi anakanyile leswaku swi tava swinene loko hi ngava ni—ni xikhongelo xa ku hanyisa, hi khongelela vavabyi. Kutani hi tshembha leswaku Xikwembu xi ta hi nyika nkarhi wa kahle.

⁸ Sweswi, vunyingi bya n'wina ma ha fanele hi ku chayela timayili to tala vusiku lebyi. Swingaleswi a ndzi ri eku vulavuleni ni mintlawa e—e Blue Boar Cafeteria, namuntlha, laha a ndzi fihlula kona. Vanhu lavo tala va kahle, ndzi va tlhavurile mavoko ya vona niku vulavula na vona, vanhu lava ndzi nga se tshama ndzi hlangana na vona, lava taka lahawani kerekeni. Kutani ndzi khensa vanghana lavo tano, kutani ndzi lava ku khensa un'wana ni un'wana wa n'wina. Van'wana va vona va khile ti rhebeyila, kutani va hi tisela. Kutani un'wana u hi tiserile bakiti ra sirapu, kumbe molasisi, ndzi pfumela leswaku a swi ri swona, ntsena ni—ni swin'wana. A mi swi tivi leswaku sweswo swi vula yini. Kutani ni mixo, ndzi pfukile ni huma endlwini, nkarhi wun'wana ku ni. . .

⁹ Mixo wun'wana kwalahaya a kuri ni makwerhu un'wana kwalahaya loyi a nga ri kahle ha kunene, a nga ri ni swiambalo ni swin'wana, u lave leswaku ndzi ya n'wi kumela swiambalo. Ndzi humile, kutani ndzi phijiwile hi bakiti ra tirhebeyila leri a ri tshamile lahaya. Ndzi ku, “Xana hi wena u nga tisa tirhebeyila leti xana?”

¹⁰ Kutani a ku, “Ee, a ndzi kalanga ndzi va na ntirho na tona. A ndzi ri kwalahawani ri nga sixa, kutani a ti ri kwalahawani.” Kutani a ku ri Makwerhu Ruddell wa mina wa kahle loyi a ti tiseke eka mina. Kutani, swingaleswi, swilo leswi ndza swi tsakela hakunene-nene.

¹¹ Ntsena Billy Paul u ndzi byerile, minkarhi leyi nga hundza, leswaku exikarhi ka nhlengetano leyi vusiku lebyi, va fanela ku teka minyikelo, lowu nga wa mina. Ndza—ndza mi khensa ha sweswo. A ndzi nga swilavanga mi ndzi endlela sweswo. Ntsena ndzi—ndzi tsakela matshalatshala ya n'wina, niku ya emahlweni, kambe sweswo a swi fanelanga. Kutani, kambe, Hosi a yi mi katekisi. Ma swi tiva, ma swi tiva, Bibe le yi teri, “Loko mi endlela lavantsongo leswinene, mi endlerile Mina.”

¹² Sweswi, a ndzi ri loyi a vulavula na n'wina, hi Hungu, hi ku kongoma. Kutani ndzi. . . Vanhu van'wana va nga hava va ri ni nhlamuselo ya leswaku—leswaku ndzi ehleketa leswaku Yesu u ta vuya ni mixo kumbe vusiku lebyi. Ndza pfumela. Sweswi, a ndzi vuli leswaku U ta va tano. Kutani, nakambe, swi nga ha endleka A nga vuyi vhiki leri taka, swi nga ha endleka ku ri lembe leri taka, ku nga hava malembe ya khume lama taka. A ndzi swi tivi leswaku U ta vuya rini. Kambe, ku ni xilo xin'we lexi ndzi lavaka ku. . . mi xi tekela enhlokweni minkarhi hinkwayo, tshamani mi lulamile minete yin'wana ni yin'wana kumbe tiawara hinkwato. Wa vona? Hi kwalaho, loko A nga vuyi namuntlha, A nga hava lahawani mundzuku. Swingaleswi swi hlayiseni emiehleketweni ya n'wina sweswo, leswaku U le ku vuyeni.

¹³ Kutani a ndzi tivi leswaku i nkarhi wihi lowu wu nga tava ku ri awara ya mina yo hetelela laha misaveni leyi, hambu kuri un'wana ni un'wana wa hina. Nakona ku hava ni un'we wa hina a tivaka leswaku U ta vuya rini. Hambu ku ri yena, N'winyi, hi Marito ya lawa ya nga ya Yena N'winyi; U teri, "Tatana, ntsena, hi yena a switivaka leswaku U ta vuya rini; hambu a ri N'wana a nga switivi leswaku U ta vuya rini." Swi tava hi loko Xikwembu xi N'wi rhumela eka hina nakambe. Kambe hi languterile ku Vuya ka Yena. Kutani loko A nga vuyi eka rixaka ra mina, A nga ha vuya eka leri landzelaka; loko A nga vuyi eka rona lero, U ta vuya eka leri ri landzelaka. Kambe, hi vumina, hi kutika a ndza ha voni ku sale nkarhi. Ntsena ndzi. . . Eka mina, swi nga ha humelela nkarhi wun'wana ni wun'wana. Sweswi, sweswo a swi vuli. . . Sweswo a swi vuli leswaku, sweswi, mi ta vona matilo va ncinca ni hinkwaswo. . . Sweswo a hi ku Vuya loku ndzi vulavulaka ha kona. Ndzi le ku vulavuleni hi ku Vutleriwa.

¹⁴ Wa vona, U endlile ku Vuya ka nharhu. U tile hi Vana vanharhu, Mavito. U ta hi vunharhu; Tatana, N'wana, Moya wo Kwetsima. Wa vona, hinkwawo ka swona i Krete la fanaka, Xikwembu lexi fanaka, hi minkarhi hinkwayo. Sweswi, ha swi tiva U tela ku tisa mintirho yi nharhu ya tintswalo; ku lulama, ku kwetsimisiwa, nkhuvalo wa Moya wo Kwetsima. Hinkwaswo, eka Xikwembu, swi hetiseka eka nharhu.

¹⁵ Kutani swingaleswi Wa ta, xosungula, ku ta kutsula Mutekiwa wa Yena. A ta, ra vumbirhi, tani hi ku Vutleriwa, ku ta teka Mutekiwa wa Yena. A ta, ra vunharhu, ni Mutekiwa wa Yena, Hosana ni Hosikazi; endzhaku, kwalaho hi kona ku Vuya loku vanhu lavo tala va ku rindzelaka.

Kambe loko A ta eka nkarhi lowu, a swi nga kali swi tika kambe lava va nga tilulamisela vata swi tiva loko A ta. Ntsena va tava va ngari kona evanhwini. A va nga switivi leswi swi nga va humelela. Ntsena va ta tlhandlukisiwa va famba, hi

xinkadyana, kutani ntsena va tava lava va lahlekeke. “Va ncinciwa hi xinkadyana, hi ku copeta ka tihlo.” Swingaleswi ntsena tilulamiseleni eka sweswo. Kutava mixo wun’wana lowu wu chavisaka ku lahlekeriwa hi varhandziwa, a kuna loyi a nga ta va kuma. Xana swi tava swi nga bihanga ku twa leswaku ku hundzile nakona a ku ku kumanga xana? Swingaleswi ntshamani emahlweni ka Xikwembu.

¹⁶ Sweswi, vhiki leri taka, loko Hosi yi swi rhandza, Musumbhunuko lowu taka, kusukela vhiki kusukela Musumbhunuko lowu, loko Xikwembu xi swi rhandza, ndzi ta tlherisela ndyangu eArizona laha va yaka exikolweni, swingaleswi ndzi—ndzi ta tlhela ndzi vuya.

¹⁷ Sweswi, a ndzi ngeyi lahaya. . . A ku na xikhongelo lexi ndzi nga ta xikhoma lahaya. Hi ku tika ndzi tava ndzi nga hari eArizona. Ndzi ya kun’wana. Ndzi ta heleketa nsati kwalahaya, hi Musumbhunuko lowu landzelaka. Ndzi ta tlhela ndzi vuya nakambe lahawani. Ndzi ta sukela lahawani kuya eBritish Columbia. Ndzi ta vuyela eColorado. Ndzi tava eArizona nakambe nkarhi wun’wana ekusuhi ni Khisimusi, ntsena xinkadyana nyana, xa ku leha ku ringanela. . . kumbexana masiku mambirhi kumbe manharhu, ndzi hlengeleta ndyangu, hi vuya lahawani hi tiholideyi ta Khisimusi, loko Hosi yi swi rhandza, hi va ni xikhongelo hi vhiki ra novinjara kwalahawani.

¹⁸ Swingaleswi ndzi kwalahawani, hi ku tivonakarisa, swinene. Ndzi lahawani hi ka khume kutlula lahaya ehandle, hikuva a hi na kereke kumbe swikhongelo swin’wana ehandle lahaya, a hi na nchumu lahaya ehandle, swingaleswi, hi ndlela ya xikhongelo xa kereke. Xexo hi lexo biha xa kona. A ndzi na ndzhawu leyi ndzi nga rhumelaka vana laha va nga ta twa Hungu leri, kukotisa vana va n’wina va ri twaka lahawani, kutani—kutani xexo i xihoxo lexi hi nga na xona. Kambe hinkwavo va hanyile kahle emirini. Ku omile, ka hisa, hi maxelo lamo oma, kambe vana hinkwavo va languteka va hanyile kahle. A ndzi vanga kwalahaya ku ringanela ku tiva loko kuri ni rihanyu kumbe ku nga ri ni rihanyu. Ndzi, ndzi le ku hundzeni, kutani ntsena ndza—ndza—ndza vhumbha ndzi tswariwile ndzi ri mutsandzeki.

¹⁹ Nsati wa mina wa ndzi vitana. . . Ndza swi tiva leswaku u lahawani, swingaleswi ndzi ta swi vona endzhaku ka kereke, hinkwerhu ma swi tiva. Xana swi vitaniwa yini sweswo, mimoya leyi tlhukutaka, kumbe mimoya leyi nga tshamisekangiki, kumbe ku nga hava kuri yini—ku nga hava kuri yini, ma yi tiva, misava leyi tlhukutaka xana? Kumbe, ndzi tshama ndzi ri eku fambeni, hi marito man’wana. Kutani ndzi tekile sweswi, ku ringana makume mbirhi-mbirhi wa malembe, kutani hi minkarhi yin’wana ndzi ehleketa leswaku ndzi muluveri endlwini, hikuva ndzi fanele ku va ndzi kumeka ndzi famba.

Kambe ndzi le ku languteleni ka nkarhi lowu hi nga ta tshamiseka eTikweni ra le kaya siku rin'wana. Kambe sweswi nyimpi yi sungurile, swingaleswi a hi veneni a xikhongelweni.

²⁰ Mi nga rivali, Sonto lowu landzelaka ni mixo, loko Hosi yi swi rhandza, tisani vavabyi va n'wina ni lava xanisekaka. Fikani ka ha ri na nkarhi, mi ta kuma ndzhawu, nakona hakanyingi ku ni ntlawa lowu nga ta khongeleriwa. Hi ta fanela ku phakela makhadi ya xikhongelo. Loko ma nga ringanelanga, a hi nga maphaki makhadi ya xikhongelo, ntsena swi tava swi ringanerile ku endla tilayini timbirhi kumbe tinharhu ta khume na timbirhi, kumbe swin'wana. Kambe hi—hi hakanyingi hi ta phaka makhadi ya xikhongelo, swingaleswi hakanyingi hi ta swiendla ku ri ngana awara ku nga si va ni xikhongelo xa ntolovelo, lexi ndzi ehleketaka leswaku xi ta teka . . . Swi tava hi awara ya nhungu, nhungu kumbe hafu ku bile awara ya nhungu, va ta phakela makhadi ya xikhongelo; va pfula kereke, va phakela makhadi ya xikhongelo hi mixo wa Sonto lowu landzelaka. Kutani vanani ni ntiyiso wa ku fika lahawani leswaku mi tikumela . . . Tisani varhandziwa va n'wina, mi va nghenisa kwalahaya. Ku tava kuri kahle ni ku hola ekerekeni, loko vavabyi, kutani hi ta endla hinkwaswo leswi hi nga swi kotaka ku va khongelela.

²¹ Ndza mi khensa, nakambe, eka ku nyikela rirhandzu.

²² Kutani sweswi hi ya hlaya rin'wana ra Rito ra Xikwembu, vusiku lebyi, kutani tilulamiseleni xiendlekalo xa Vukona bya Xona nakambe ku hi tisela Rito ra Xona. Sweswi, ha swi tiva hi nga ha hlaya tsalwa, kambe Xikwembu xi fanele ku hlavutela mongo. Wa vona? Hi nga ha teka tsalwa, kambe Xikwembu xi fanele ku hlavutela mongo wa rona. Kutani loko ma ha phendla Buku ya Yeremiya, ndzimana ya vu2.

²³ Ndzi lava kuvula leswaku ndzi tsakile loko, u ri na hina, Makwerhu Lee Vayle, makwerhu wa nkoka eHosini. Kutani ndzi ehleketa leswaku lahawani, makwerhu lahawani, a ndza ha ehleketi vito ra yena, Makwerhu Willard Crase. Kutani ndzi vonile vamakwerhu vo huma Arkansas, Makwerhu John na vona, va huma kwala ePoplar Bluff, na Makwerhu Blair. Kutani, oho, Makwerhu Jackson, na Makwerhu Ruddell, ni vo tala lava ntsena a ndzi—ndzi nga . . . A ndzi ta tsakela ku vitana un'wana na un'wana hi vito, kambe a ndzi nga swi endli, kutani ma swi twisisa. Makwerhu Ben Bryant, ndza n'wi vona u tshamile lahawani; hi ntolovelo hi yena amen ya mina ya le khoneni loko ndza ha . . . Un'wana ni un'wana u tiva Ben hi rito ra yena. A haa.

²⁴ Hina, loko ha ha tshamile eCalifornia nkarhi wun'wana, a ndzi ri eku chumayeleni ka Hungu eka vanhu va Baptist enkoveni. A va ri ni tende lerikulu kwalahaya, kutani votala a va ri ma Baptist va xitayele. A ndzi kalanga ndzi twa “amen” yi huma kun'wana;

ma swi tiva, ndzi chavisiwile hi vavasati van'wana lava a va kwamulela tipende leti a ti ri eswikandzeni swa vona. Kutani swingaleswi, xo sungula mi xi tivaka, ndzi vonile mikondzo yimbirhi yo tani hi *sweswo*, yi ya emoyeni, ni mavoko mambirhi lamakulu, ni misisi ya ntima leyi a yi ri ku ninginikeni kwalahaya, va ri eku huweleleni ka, "Amen," va huwelela hi ndlela yaleyo. Kutani ndzi langutile ehansi, ndzi ku, "Ben, u huma kwihhi xana?" Hakunene a ri eku kumeni ka "amen."

²⁵ Ndzi vona nsati wa yena a n'wi langutisa, kantsongo. Kunene, a lahlekeriwile kantsongo hi misisi ya yena ya ntima, kambe sweswi yi kahle, ma swi tiva. Mi nga kali mi vilela ha sweswo. Ndzi swi endlile, na mina, nkarhi wo leha lowu nga hundza.

Swingaleswi, sweswi, mi nga rivali ku khongela.

²⁶ Sweswi loko ha ha nghena eka tlhelo leri tshembhekeke ra xikhongelo, tsundzukani, loko hi hlaya Rito leri, swingaleswi Xikwembu xi ta katekisa Rito ra Xona. "A ri nga tlheleli eka Xona ri nga ri ni nchumu, kambe Ri ta hetisisa leswi Ri fanelaka ku endla swona." Kutani ndza swi tiva, hi ku hlaya Rito, ndzi tava ni ntiyiso minkarhi hinkwayo. Loko ndzi hlaya Rito, Xikwembu xi ta xixima Rito ra Xona.

²⁷ Sweswi a hi yimeni hi hlonipha Rito ra Xona. Yeremiya, ndzimana ya vu2, vhese ya vu12 ni ya vu13 ya Yeremiya 2.

Tanani mi hlamala, O . . n'wina matilo, hi mhaka leyi, mi ta rhurhumela, mi titivala, ku vula Hosi.

Hikuwa tiko ra mina ri dyohile kambirhi; va ndzi tshikile mina ndzi nga xihlovo xa mati lama pfelelaka, kambe va tincelele swihlovo, swihlovo leswi handzukeke, leswi nga kotiki . . . ku hlayisa mati.

A hi korhamiseni tinhloko ta hina sweswi.

²⁸ Xikwembu lexi rhandzekaka, Rito ra Wena ri hlayiwile. Kutani ha khongela leswaku U ta xixima Rito rero niku hi nyika xifaniso kumbe ku anama ka Rona vusiku lebyi; tani hiloko hi languta emasikwini lama nga hundza, Israel, tani hi swikombiso, tani hilaha Biblele yi hi dyondzisaka leswaku hi ta vona leswi U va endleleke swona loko va hlayisile Rito, ni ku vona leswi U va endleleke swona loko va nga hlayisanga Rito, kutani hi dyondza leswi hi faneleke ku swi endlaka. Swingaleswi, ha khongela leswaku U ta vulavula na hina vusiku lebyi hi ndlela yo hlawuleka, leswaku hi nga ha tiva hilaha hi nga tilangutelaka ha kona esikwini leri, leri hi nga dyondza ha rona mixo lowu leri hi hanyaka eka rona. Hikwalaho ha swi kombela hi Vito ra Yesu. Amen.

Mi nga tshamiseka.

²⁹ Ndzi lava ku vulavula vusiku lebyi hi dyondzo, ntsena hi—hi ku komisa leyi nge: *Swihlovo Leswi Handzukeke*.

³⁰ Israel a ri dyohile kambirhi. Xikwembu xi teri va Xi hundzuckerile, Xihlovo xa Vutomi, kutani va ticelele swihlovo leswi va nga ta nwa eka swona. Sweswi, hi swin'wana sweswo.

³¹ Xivangelo xa ku anakanya ku vulavula hi tsalwa leri a kuri hileswaku ri ta fambisana ni leswi a ndzi ri eku vulavuleni hi swona mixo lowu, hi awara leyi hi hanyaka eka yona, ni Xivangelo lexi hi ti karhatelaka xona.

³² Kutani hi languta eka Israel tani hi xikombiso, xa leswaku, xa leswaku Xikwembu a xi ri njhani, minkarhi hinkwayo Xi fanele xi fana. Nakona ku ni xilo xin'we lexi Xikwembu xi nga tshama xi xi xixima, xexo a kuri, ndlela ya Xona leyi Xi yi tiselaka vanhu. Kutani loko va huma eka ndlela yaleyo, swingaleswi Xikwembu a xi nga ha xiximiwanga, kutani Xikwembu xi endlile leswaku vanhu va xaniseka hi ku tihumesa eka leswi Xi va byelege leswaku va swi endla, a swi na mhaka leswaku a kuri yini.

Xi va nyikile hambu wu ri nawu, “Mi nga tshuki mi khumbha, mi nga tshuki mi rhwala, mi nga tshuki mi ringa.” Ntsena kungari hikuva swi ni vudyoho ku swi endla, kambe kuri hi xidyoho xa kuva va nga hlayisanga leswi Xi nge teri va swi endla. Nakona hintolovelo a ku na nawu lowu nga riki ni ku xupula ka nawu wolowo. Hikuva, loko ku nga ri na ku xupula, swingaleswi, nawu a wu vuli nchumu ehandle ka loko wu ri ni xigwevo. Nawu!

³³ Sweswi, hi kuma, leswi va swi endleke hi siku lero leswi swi tikombaka swi vambhelana ni leswi hi swi endlaka namuntlha, leswi vanhu va kereke va nga eku swiendleni.

³⁴ Sweswi hi vona leswi nga toloveriwangiki lahawani. Swi ngava swi nga tolovelekanga eka vanhu van'wana, loko Xi te, “Mi ti, va ti, celele swihlovo vona hi voxe, swihlovo leswi handzukeke.” Sweswi, kumbexana van'wana va n'wina a mi swi tiva leswaku xihlovo i yini. Xana i vangani lava tivaka leswaku xihlovo i yini xana? Kunene, hakanyingi hinkwerhu ka n'wina. Loko mi tshame mi kulela epurasini, ma swi tiva leswaku xihlovo i yini. Ndzi tsundzuka ndzi nwile tinsikiti eka xin'wana, ku—ku tiva leswaku xihlovo a—a xi ri yini.

Ku chumayila etikweni laha, ku nga ni mindzhuti ya minsinya, laha mi nga vaka ni goji lerikulu ra xihlovo xa mati kwalaho, lawa ya humaka eka—eka mpfula, ma swi tiva, xi languteka xi ri xa khale. Kutani—kutani tinsikiti, hi nkarhi wa ni vusiku, tinghena endzeni ka xona. Kutani ndza switiva leswaku xihlovo xa mati i yini.

³⁵ Xi—xi xihlovo i—i ndzhawu, i nchumu lowu ceriwaka ehansi, ku va xi yimela pitsi. Loko vanhu va nga ri na xihlovo, swingaleswi va va ni—ni xihlovo. Hi marito man'wana, xihlovo i thangi leri endlweke hi munhu kumbe xihlovo lexi endlweke hi munhu ehansi, lexi munhu a xi celaka, ku kuma mati,

leswaku a—a ma tirhisa. Van'wana va vona va ya tirhisa ku hlantshwa, kutani van'wana va ya tirhisa ku nwa, ni hi tindlela to hambana, kumbexana. Mati hinkwako nkarhi wun'wana, lama hi toloveleke ku ma kuma, a ya ri ya xihlovo. A hi tolovele kuva ni nchumu wa xikhale lowu a hi wu rhendzelelexa, hi rhendzelekisa, hi rhendzelekisa, hi rhendzelekisa, hi rhendzelekisa, ku endlela leswaku mati ya huma; hiva hi vekerile swibakitani eka wona, ku ka mati exhlobyeni.

³⁶ Kunene, hi xiyisisa xilo xin'we eka xihlovo lexi hambanaka na pitsi. Sweswi, xihlovo xa phya. Xi—xi—xi xihlovo a xi ti pfererisi hi xoxe. A xi—xi. . . A xi tshembheleki. Mi ngaka mi nga tshembheli eka xihlovo. Xi fanele ku tshembhela ni ku hanya hi timpfula leti tinaka hi ximumu kumbe hi xixika, hambi yi ngava yi ri ya rini. . . Hi ntolovelo, hi nkarhi wa xixika loko gamboko ni timpfula swi ta, swingaleswi ti khulukerisa mati exhlobyeni. Kutani loko xi nga kumi mati yalawo, swingaleswi a mi—mi nga vi na mati. Xi tava—xi tava. . . xi omile. Nakona xi ngaka xi nga ti tati hi xoxe. Xihlovo xa khale xi ngaka xi nga ti tati hi xoxe. Xi tatiwa hi—hi timpfula leti ti naka.

³⁷ Kutani ndzi mi lava mi xiyisisa xin'wana hi xihlovo. Hi ntolovelo, mi kuma, kumbe hi ndlela leyi xi nga xiswona endzhawini ya hina, xihlovo. . . Ha kanyingi dulu ri nghena kambirhi hi makulele eka yindlu, hakanyingi mati ya khuluka ya suka eka dulu, ya ya exhlobyeni. Ndzi tsundzuka xihlovo lexiya xa khale lahaya, loko a ri. . . loko ti—ti tiphayiphi ta tidreyini ti makhulukisa eka tona, na tona, ya huma edulwini. Xi tatiwa hi lawa ya humaka edulwini.

Swingaleswi mati ya rhwariwa kusuka elangwini ra dulu; laha, swifuwo hinkwaswo a swi famba-famba hinkwako etaleni, ni thyaka hinkwaro ra kwalahaya dulwini ri tshamaka ehenhla ka dulu, hi minkarhi leyi ri nga oma. Kutani mati ya ta ya fika ya ri hlantswa ri suka elangwini, ri ta hi xindledyana lexi nga endla hi munhu, kutani ri ya eka ku pfelela loku ku endliweke hi munhu, ri ya fika eka xihlovo lexi endliweke hi munhu. Kutani loko u nga se tshama u va na thyaka, a ndzi swi tivi leswaku u na yini, loko u ri na xihlovo. Ina, nkulukumba! Hinkwaxo xi endle hi munhu, nakona xi thyake njhani.

³⁸ Ma swi tiva, a hi toloverile ku xivitana. . . A hi ri ni lapi ro kukuta eka xin'wana. Xana mikale mi switiva sweswo leswaku a ku ri yini xana? A hi fanele ku vekela lapi ro kukuta eka xona, leswaku hi ta phasa tinsikiti ni swin'wana leswi swi humaka ehenhla ka—ka dulu, ni leswi nga kwalaho, ni leswi humesiweke kun'wana swi ya kun'wana, swi nghena exhlobyeni. Kutani a hi toloverile ku vekela la—la lapi ro kukuta eka xona, ku kukuta hi—hi nkwxo xikhuvi ni leswi hi nga swi kotaka. Hikokwalaho, sweswo a swi nga ta ri khoma

thyaka ra xiviri, ntsena a ri khoma timizayili letikulu leti a ti ta ehansi ti fika ti wela eka xona. Nsikiti yi nga ha wela eka rona, kambe juzi ya nsikiti yi famba na mati. Swingaleswi, mi—mi va mi ri na thyaka ra xiviri hakunene loko mi ri na xihlovo xa khale xa thyaka.

³⁹ Hi masiku mantsongo, loko u tshika mati ya lawa ya yima lahaya, kutani ma hundzuka mati lama yimeke. Loko mi tshika mati ya yima exihlobyeni, ma hundzuka mati lama yimeke. Kutani xi kumeka xi tele hi—hi mintlambya, na minkolombyana, na tinyoka. Kutani a hi tolovele ku swi vitana “swivuluvulu,” swilo leswi ntsongo... A ndzi tivi loko... A hi ti pharasayiti, hi swona... A ndzi swi koti, a ndzi tivi leswaku mi swi vitana yini. Kambe i swilo swin’wana leswi ntsongo leswi kumekaka ematini, leswi—leswi hi swi vitanaka swivuluvulu. Ma swi tiva leswaku i yini. Xana i vangani lava tivaka leswi ndzi vulavulaka ha swona xana? Oho, hikokwalaho ka yini, hakunene, hinkwavo vanhu va tiko ra n’wina va swi tiva. Mi swi kuma laha ku nga ni mati lamo tala ma yimeke, kutani lava rhandzaka mati lamo yima va ta na wona. Ntsena kahlekahe swo ta, hikuva mati ya yimile. Kutani hikokwalaho ka kuva ma yimile, ma koka xiharhi lexi rhandzaka leswi kumekaka ematini lama nga yima.

⁴⁰ Kutani hinkwaswo leswi swi fana ni tikereke ta hina namuntlha. Ndzi ehleketa leswaku hi siye... Xin’wana xa swidyoho leswikulu leswi kereke yi swi endleke namuntlha, ntsena ku kotisa Israel, ri nga N’wi sukela, Xihlovo xa Mati lama pfelelaka, kutani va ticelele swihlovo leswi endliweke hi munhu. Kutani xi vile laha ku hanyaka xin’wana na xin’wana lexi xi rhandzaka muxaka walowo wa mati. Minkolombyana, mintlambya, ni tinxaka hinkwato ta switsongwatsongwana leswi nga basangiki, swi hanya eka xona, hikuva i thangi leri endliweke hi munhu. Kutani swilo leswi swi tshama eka thangi leri, xi nga xikombiso lexi hetisekeke xa xidinominexini namuntlha.

⁴¹ “Sweswi,” mi ri, “Makwerhu Branham, xana hikokwalaho ka yini u ba vanhu lava hi kuva tikisela xana?”

Ri fanele riba eka vona. Ri fanele ku va ba. Swi balekeleni, hikuva eku heteleleni swi ta endla mfungo wa xivandzana. Tsundzukani, walowo i Ntiyiso! Swi tava mfungo wa xivandzana. Dinominexini yi ta mi yisa eka wona. Swi le ndleleni yo ya kona sweswi, hi ku tlimbeleta, hi matimba.

⁴² Langutisani eka mfumo wa khale wa Rhoma. Sweswo hi swona hakunene leswi swi nga va yisa eka mfungo wa vugwinihi. Mi kuma leswaku ku hava munhu loyi a nga ta xava kumbe ku xavisa loko a nga ri na mfungo wa xivandzana. A fanela ku va na wona.

43 Ku ni mintlawwa yimbirhi ntsena ya vanhu lava nga emisaveni; lava nga ni Xilemo xa Xikwembu, ni lava va nga ni mfungho wa xivandzana. Mintlawwa yimbirhi ntsena, swingaleswi mi fanele ku wela kun'wana kumbe hala kun'wana. Kutava ku ri vugwinihi, mfu—mfu mfungho wa—wa vukhongereri, vugwinihi bya vukhongereri.

44 Kutani swi tava ni xifaniso eka xivandzana. Tani hi loko hi dyondzile, hi kumile leswaku Rhoma a yi ri yona, hi yona, nakona yi ta tshama yi ri yona minkarhi hinkwayo, mfu... kumbe, xivandzana. Hi swona. A ku na ndlela yin'wana leyi mi nga ta kuma swin'wana. Rhoma!

45 Kutani xana Rhoma yi endlile yini xana? Yi ncinciwile kusuka eka Rhoma ya vuhedeni ku ya eka vulawuri bya Rhoma, kutani yi kondletela matirhelo, matirhelo ya misava hinkwayo, lawa ya bohelelaka un'wana na un'wana eka vukhongereri byebyo kumbe u dlayiwa.

46 Kutani i nchumu lowu wu chavisaka wa leswaku United States leri na rona ri le ku swi endleni, nakona ri kotisa xinyimpfana. Kutani xinyimpfana xi ni swimhondwana swimbirhi, timfanelo ta xin'wana ni leti nga ta kereke. Kutani endzhaku nyana, loko lero ra hari xinyimpfana, hi kuma leswaku ri vulavula ku fana ni dirayigona ni ku tirhisa matimba hinkwawo lama drayigona a yi ri na wona. Kutani Bible ye hi byela leswaku va teri, "A hi tiakeleni xifaniso xa xivandzana." Xifaniso i xilo lexi fanaka ni xin'wana. Kutani hi nga ha swi vona sweswo sweswi, eka xi yimo xa rona xa vugwinihi, kereke yi le ku vumbeni ka Huvo ya Tikereke ta Misava, laha ku nga xifaniso xa matimba ya Rhoma; kutani xi ta bohelela vanhu ku endla leswi Rhoma ya vuhedeni yi swi endleke... kumbe leswi swi endlilwa hi vulawuri bya Rhoma. Swingaleswi, a ku na ndlela yin'wana, a ku na nchumu wun'wana. Kambe walowo i Ntiyiso.

47 Kutani hi yona mhaka ndzi swi baka eka nguva ya mina, eka nkarhi wa mina, hikuva swi fanele ku biwa. Ku nghenile ku huwelela, leswaku, "Humani eka yena, vanhu va Mina, leswaku mi nga tshuki mi nghena eku dyoheni ka yena!"

48 Sweswi, ndzi hlanganisa ni sweswo eka thyaka leri, ra swihlovo leswi thyakeke. "Hi Yena Xihlovo xa Vutomi. Hi Yena Mati lama ya pfelelaka." Kutani vanhu va sukele ya Lawa, kutani va ticelela swihlovo leswi swi nga khomaka thyaka ntsena. Sweswo hi swona ntsena leswi xi nga swi hlayisaka. Kutani sweswo hi swona leswi xidinominexini xi swi endlaka; yi hlayisa hinkwaswo leswi taka ni leswi lavaka ku joyina. Va swi navela ku swi teka loko swi ri ni mali kumbe swi ambala hi ndlela yin'wana. Swi nga ri na mhaka leswaku i vamani, va huma kwihhi, va va teka, hi mukhuva wun'wana.

⁴⁹ Sweswi hi kuma leswaku, nakambe, leswaku, mfungho lowu wa xivandzana lowu vumbiweke lahawani. Amerika, ri, le ka xiyimo xa vukhume nharhu. Ri tswariwile ni matiko ya khume nharhu. Ri ni mujeko lowu wu nga ni tinyeleti ta khume nharhu, tilayini ta khume nharhu. Hambi swiritano ra vonakala eka Nhluvutelo ndzimana ya vul3. Nakona Amerika minkarhi hinkwayo ri wansati, loyi a ri yimeleka eka swingwence swa hina. Hambi kuri nhloko ya Mukula, eka peni, na yona i ya xivumbeko xa wansati. Ha swi tiva sweswo, tivani xitorhi xa swona. Ni hinkwaswo, Liberty Bell, ni hinkwaswo nakambe, ntshunxeko... Xifaniso xa Liberty i, hinkwaswo, i wansati. Wansati; xiyimo xa vukhume nharhu. Wa vona? Sweswi, swi—swi sasekile ku vona swilo leswi.

⁵⁰ Kutani sweswi ndzi vhumbhile hi nhluvutelo wa Xikwembu, kumbe hi xivono xa 1933, leswaku swilo swa nkombo swi ta humelela loko nkarhi wa makumu wu nga si fika. Kutani xexo, i xin'wana xa swona, leswaku, "Mussolini," loyi a hundzekeke mulerisi, "u tava mulerisi. Kutani, na swona, u ta endla nhlasele ni kuya eEthiopia, kutani u ta teka Ethiopia. Kutani Moya, Wu teri, 'U tava eku fambeni ka yena.'"

⁵¹ Ndzi nga hlamala loko ka hari ni swidyuhati leswi nga sala etabernakeleni, ma ndzi tsundzuka loko ndzi ta vula leswi eRedman's Hall ehansi lahawani loko hi chumayerile, eka yo hlaya, malembe yo hlaya, lawa ya hundzeke. Xana ka ha ri na un'wana lahawani emuakwini, vusiku lebyi, loyi a ri kona lahaya Redman's Hall ya khale loko ndzi ta chumayela ha sweswo, loko va tava va vile na N.R.A. ehandle, endzhaku hi nkarhi wa ku fuma ka Roosevelt ro sungula xana? Ndzi vhumbha leswaku ku hava na un'we lahawani. Xana u kona un'we xana? Ina, ina, un'we, ku ni un'we. Ina, Manana Wilson, ndza n'wi tsundzuka. Nsati wa mina, u tshamile endzhaku. Ku sale vambirhi, eka lava va nguva ya khale ya nkarhi walowo.

Leswaku, loko va teri N.R.A. leyi a yi ri mfungho wa xivandzana, ndzi teri, "A ku na nchumu ha wona; ku hava nchumu. Mfungho wa xivandzana a wu ti wu huma lahawani. Wu ta wu huna eRhoma. Nakona a wu nga vi mfungho wa xivandzana."

⁵² Kutani sweswi tsundzukani leswaku swilo leswi swi vuriwile. Xi ku, "Adolph Hitler u ta fika emakumu hi ndlela ya xihundla. Nakona u ta hlambanya nyimpi eUnited States. Kutani va ta aka nchumu—lowu—lowukulu lowu wu tyeke, lowu hambu kuri ku tshama va nga ta tshama eka wona. Kutani kwalahaya hilaha va-Amerika va nga ta ba kona hilaha ku chavisaka, eka leswi." Kutani a wu ri ntila wa Siegfried, malembe ya khume n'we wu nga si akiwa. Kutani swingaleswi xi ku, "Kambe u ta fika emakumu; kutani States ri ta hlula nyimpi."

⁵³ Kutani swingaleswi xi ku, leswaku, “Ku ni ti izimu tinharhu; Nazizim, fasizim, ni xikhomonisi.” Hiloko ndzi ku, “Hinkwavo va ta helela eka xikhomonisi. Russia ri ta switeka hinkwaswo, hi xikhomonisi.”

⁵⁴ Hiloko ndzi ku, “Swingaleswi sayense yi tava leyikulu, munhu a va la tlhariheke swinene, ku kondza a kuma swilo swo tala ku fikela laha a endlaka movha lowu wu fanaka na tandza, lowu wu nga kotisa ghilazi ehenhla ka wona, kutani wu ta lawuriwa hi matimba man’wana kutlula xidirayivha.” Kutani va na wona movha yaleyo.

⁵⁵ Hiloko ndzi ku, “Swingaleswi vugangu bya vavasati va hina byi ya va lebyi onhekeke swinene, ku kondza laha byi nga ta khomisa ni tingana eka matiko hinkwawo. Va ta ambala swiambalo swa vavanuna. Va ta tshamela ro hluvula swiambalo swa vona ku kondza va fikaka laha swi tikombaka tani hiloko va sale hi swo rhangisa swa vona, hi swona hinkwaswo sweswo. Kutani, eku heteleleni, va ta hetelela hi ku ambala tluka ra nkuwa.”

Kutani loko mi nga xiyisisa, eka magazini ya *Life* ya nh’weti leyi nga hundza, a va fanisile wansati loyi a ambarile matluka ya nkuwa. Kutani yaleyo i rhoko leyi ntshwa ya ni madyambu, kumbe nguvu, leyi va yi ambalaka ni madyambu; yo vonikela, mi nga ha vona hi kwalahaya ka yona, ntsena matluka ya nkuwa lawa ya nga sirhelela xiphemu xin’wana xa miri wa yena; ma nga na ringoti, kumbe xitambhyana, tisuti leti nga chuchiwiki to hlamba hi tona, ehenhla ka tona, ti siya miri ehandle. Kutani swilo leswi swi humelela njhani!

⁵⁶ Hiloko ndzi ku, “Ndzi vonile wansati a yimile eUnited States, tani hi hosikazi lonkulu kumbe swin’wana. Nakona u sasekile loko u n’wi languta, kambe a tsanile embilwini ya yena. Kutani u endlile leswaku tiko ri teka goza, ri landzelela minkondzo ya yena.”

⁵⁷ Hiloko ndzi ku, “Eku heteleleni, U ndzi byerile ku langutisa eVuxeni nakambe. Kutani, loko ndzi hundzulukile, ndzi vonile, a swi languteka ku kotisa, tani hi laha a swi ri ha kona, misava a yi bulukile. Kutani tani hilaha ndzi nga ha swivonaka, a ku ri hava nchumu handle ka timhandzi, ni—ni maribye lama a ma ri ku vumbulukeni ma huma endzeni ka misava.”

Kutani leswi swi ta humelela misava yi nga si hela. Kutani ntlhanu eka leswa nkombo swi humelerile, hi malembe ya makume nharhu-nharhu. Kwalaho hi nga kona, hi tlhelela enkarhini wa makumu!

⁵⁸ Kutani ndzi vulavurile ndzi lwisana ni mafambiselo ya lawa ya xidinominexini kusukela kwalaho. Kutani ndza ha pfumela, vusiku lebyi, leswaku sweswo kova tlhivi ra mati, yaleyo yo va ndzhawu laha thyaka ri tsutsumelaka kona. A ndzi pfumeli leswaku Xikwembu xi nga kala xi teka nchumu

wo kotisa walowo eKerekeni ya Xona, hikuva wu fanele ku tswariwa hi Moya wa Xikwembu kutani wu basisiwa wu nga si vitaniwa wa Xona. Miri wa xihundla wa Kreste, hi khuvuleriwile eka Wona hi nkhuwulo wa Moya wo Kwetsima.

⁵⁹ Ina, mafambiselo lawa ya xihlovo hakunene-nene yo va xikombiso lexi xi hetisekeke xa dinominexini. Munhu la tlhariheke u fanele ku langutisa, kutani a nga kali a ya eka yona, hikuva Xikwembu xi swi khorwisile kuya hi tinguva leswaku Xi lwisana na yona nakona a xi kalanga xi tirha na yona. Ntlawa wihi... Nkarhi wun'wana ni wanuna wa pfuka ni hungu, tani hi Luther, Wesley, kumbe ku ya emahlweni, na Smith, na Calvin, na vona; loko va tava va sungurile vandla, Xikwembu xi vekile nchumu exelufini kutani a xa ha kalanga xi wu endzela nakambe empfuxelelweni.

⁶⁰ Langutani eka matimu. Ku hava ni nkarhi lowu Xikwembu xi nga tshama xi teka dinominexini, xi endla mpfuxelelo ha yona, ku hava. Swingaleswi, ku ya hi matimu ni hi Bibebe, swi tiyisisa leswaku i nchumu lowu wu thyakeke emahlweni ka Xikwembu, swingaleswi a ndzi lavi ku endla nchumu ha wona. Kutani hi yona mhaka ndzi lwisanaka na yona. Ndzi le ku ringeteni ka ku humesa vanhu eka yona.

⁶¹ Ha rhambiwa, tani hi le Israel, swingaleswi swi tano na sweswi, leswaku hi languta Israel tani hi xikombiso. Vona, ntsema loko va tshama na Xihlovo xexo, a va tava va ri kahle. Kambe loko va sungula ku ti handzela swihlovo swa vona, mafambiselo lawa ya nga endla hi munhu, kutani Xikwembu xi va sukerile va badamile. Xi ta hi endlela swo fana. "Va Xi tshikile, Xihlovo xa Mati lama pfelelaka." Xexo a xi ri xivilelo lexi Xikwembu a xi ri na xona ku lwisana na vona. "Ku endla swin'wana leswi va nga swi vulaka, 'Ma swi vona leswi hi nga swi endla!'"

⁶² Sweswi, enkarhini wa ku—ku famba ka Muxe; loko Xikwembu, hi tintswalo, xi va nyikile muprofeta, xi va nyikile Langavi ra Ndzilo leswaku ri famba emahlweni ka vona, xi ri Ri tiyisisile hi swikombiso ni mahlori. Tintswalo ti tisile swilo leswi hinkwaswo. Israel a ra ha tama ri lava, ku vona nawu. Va arile tintswalo, va teka nawu.

Sweswo hi leswi vanhu va swi endlaka namuntlha. Va ala Rito, va ti tekela mafambiselo ya xidinominexini, hikuva eka wona va nga ha kota ku endla leswi va swi lavaka niku tiseketela ha swona. Kambe mi ngaka mi nga swi endlile eka Kreste! Mi fanele ku ta mi basile niku tenga, leswaku mi va eka Kreste.

⁶³ Mi tshika xihlovo xa mati yo yima, xa mafambiselo lawa ya nga endla hi munhu kumbe xihlovo, xana mi nga swi anakanya loko un'wana a swi endlile? Mi nga ha xi anakanya xiyimo xa miehleketo ya munhu loyi a nwaka mati yo tenga ya xihlovo xa

mati yo yima, kutani a tshika xihlovo xexo lexi nga endliwa hi munhu xa mintlambya, na minkolobyana, na swivuluvulu, ni hinkwaswo leswi nga eka xona xana?

A swi languteki swi twala hambu kuri ku twala leswaku swi kahle, kambe sweswo hi swona leswi vanhu va swi endleke. Va tshikile Rito, Xihlovo xa ntiyiso xa tshaku ra Xikwembu ni Matimba, va ya nwa eswihlobyeni, ni ku ti endlela swihlovo. Ku kotisa leswi va swi endleke ekusunguleni, va swi endlile na sweswi. Va ri . . .

Xi teri, “Va Ndzi tshikile.” Lahawani Xi te, lahawani eka Yeremiya 2:14, kumbe 13, kumbexana. Xi ku, “Va Ndzi tshikile, ndzi nga Xihlovo xa Mati lama pfelelaka.”

⁶⁴ Sweswi, ha swi vona leswi xihlovo i yini. Ha swi vona leswi xi swi khomaka. Ha swi vona leswi xi nga endlisiwa xiswona. I xilo lexi xi endlaweke hi munhu swilo leswi swi humaka elwangwini ro thyaka. Mati lama ya welaka ehansi, ya wela elangwini ra thyaka, nakona ya hlantswa lwangu, ma ya wela exitsengeleni lexi endlaweke hi munhu, ma ya humelela hi ku pfelela loku ku endlaweke hi munhu, ku ya fika eyinkhweni leyi yi endlaweke hi munhu. Kutani thyaka hinkwaro leri ri nhlengeletana kwalahaya, ni swi—swi swintsongwatsongwani, ni minkolombyana, ni mintlambya, ni hinkwaswo swilo swa misava, swo fana ni sweswo. Kutani, xiysisani, i swihadyani leswi nga basangiki; swivuluvulu, mati lamo yima. Swivuluvulu a swi hanyi ematini lamo tenga. Loko xi nga nghena, ma ta xi dlaya. Xi fanela ku va ematini lama yimeke.

⁶⁵ Kutani hi yona ndlela leyi ti nga ha yona tipharasayiti leti namuntlha. Mi ngaka mi nga hanyi ematini lamo tenga ya Moya wo Kwetsima. Swingaleswi hi xona xivangelo va yimaka niku lwisana ni Rito, kutani va ku, “Ra tikaneta rona hi Roxe. A ku ni nchumu eka Rona.” Swi hi kokwalaho ka kuva vari ni muxaka wa n’wana wa xidziva xa mati yo yima kuva va pulutela kwalahaya. Hi swona.

Swi hi ndlela yaleyo nile ka mintlambya, nile ka minkolombyana, nile ka swivuluvulu, ni swin’wana swo fana ni sweswo. Va fanele ku nghena ehlangasini kumbe exidziveni xa mati lawa ya yimeke, ku hanya kona, hikuva i ntumbuluko wa vona ku hanya kwalahaya. Nakona a wu nge swikoti ku ncinca xiharhi ku kondza u ncinca ntumbuluko wa xona.

Kutani a wu nge swikoti ku endla leswaku munhu a vona Rito ra Xikwembu ku kondza ntumbuluko wa yena wu ncinciwa; kutani loko ntumbuluko wa yena wu ncinciwile eka leswi a nga xiswona, a va n’wana wa Xikwembu, ni Moya wo Kwetsima wa ta eka yena. Moya wo Kwetsima wu tsarile Rito ra Xikwembu!

⁶⁶ Namuntlha a ndzi ri eku vulavuleni ni munghana wa mina wa kahle, Doctor Lee Vayle, loyi a nga kona sweswi. Kutani u

dyondzele swa vukhongeri, kutani swingaleswi hi tshamela ku va ni—ku va ni mbulavurisano wa kahle lowunene hi Matsalwa. Hi vutlharhi swinene.

Kutani u ndzi vutisile nkarhi wun'wana hi leswi ndzi swi anakanyaka hi vumbhoni lebyo sungula bya Moya wo Kwetsima, “Xana a ku ri ku vulavula hi tindzimi xana?” A swi ri swa malembe yo tala lawa ya nga hundza.

Ndzi ku, “Ee; a wu nga swi voni sweswo.”

A ku, “Hambi a ri mina,” a ku, “hambi ndzi dyondzisile sweswo.” A ku, “Xana a wu ta ehleketa yini loko a byi ri vumbhoni xana?”

⁶⁷ Ndzi ku, “Vumbhoni lebyi nga hetiseka ndzi nga ha ehleketa hi rirhandzu.” Kutani swingaleswi hi fanele ku vulavula hi sweswo.

Kutani swingaleswi a ndzi ehleketa leswaku sweswo swi twala swi ri kahle ntsena ndzi lo khomelela eka sweswo, “Loko munhu a ri ni rirhandzu.”

Kambe siku rin'wana Hosi, eka xivono, yi ndzi tiyisisile. Hiloko Yi ku, leswaku, “Vumbhoni bya Moya i bya lava va nga amukelaka Rito,” hambi rirhandzu, hambi ku ri kuvulavula hi tindzimi, kambe i ku amukela Rito.

⁶⁸ Kutani swingaleswi Doctor Vayle a vula leswi eka mina, leswaku, “Sweswo i swa Matsalwa,” a ku, “hikuva, eka Yohana 14, Yesu u teri, ‘Loko Yena Moya wo Kwetsima wu tata eka n'wina, U ta mi paluxela swilo leswi, leswi Ndzi nga mi dyondzisa swona, kutani u ta mi komba ni swilo leswi nga tata.’”

Swingaleswi ku ni vumbhoni bya xiviri bya Moya wo Kwetsima! A nga kalanga a ndzi byela swin'wana leswi hoxekeke. Leswaku, “Byona i vumbhoni bya Moya wo Kwetsima, hi loyi a pfumelaka Rito.” Mi nga ha Ri amukela.

Hikuva, Yesu a nga kalanga a ku, “Loko Moya wo Kwetsima wu ta, mi ta vulavula hi tindzimi.” A nga kalanga a ku, Moya wo Kwetsima loko wu ta, mi ta endla swin'wana swa swilo sweswo. Kambe U teri, “Wu ta teka swilo leswi swi nga swa Mina kutani wu mi komba swona, kutani wu ta mi komba ni leswi swi nga tata.” Swingaleswi kwalahaya hilaha ku nga na vumbhoni bya xiviri bya Moya wo Kwetsima, ku ya hi Yesu hi Yexe.

⁶⁹ Swingaleswi hinkwabyo vutitwi lebyi ni swilo leswi vanhu va nga na swona nakona va ha hanya eka swona, mi nga ha swi vona loko va swi endla. Wa vona, swi hundzuka dinominexini, kumbe xidziva xa mati yo yima, kutani a ku nge he pfuki ku vile ni dinominexini leyi nga akiwa ehenhla ka a swi-...ka Rito ra Xikwembu leri hetisekeke. A swi nge endleki, hikuva a wu nge kondleteli kumbe ku kondletela Xikwembu. Ee, nkulukumba!

⁷⁰ Xivangelo i xa leswaku, mi kuma ntlawa wa vanhu lava va nga ta pfumela Rito, mi va pfumelele va sungula nhlango. Nchumu wo sungula mi wu tivaka, hi nkarhi lowu ringanaka lembe a kuri ni ntlawa wa va Rickies kwalahaya lowu mi nga taka mi nga endli nchumu ha wona. Va khomelerile, nakona a wu nge pfuki u endle nchumu ha swona. A hi mafambiselo ya Xikwembu. A swi tano, swingaleswi a swi tiva leswaku swilo sweswo swi humile endleleni. Swi hundzukile xihlovo, kutani swi va laha un'wana ni un'wana a nga ta tise gula eka *leswi*, *sweswo*, kumbe *swin'wana*, leswaku va kuma swirho swi nghena kwalahaya, kumbe ku pfumelela vanhu va nghena.

⁷¹ Hi kuma leswaku, mafambiselo lawa ya sungule nkarhi wun'wana, endzhaku eminkarhini ya va-Israel, loko va ha cela swihlovo leswi. Nakona a kuri ni wanuna loyi a ri ni ntlawa wa va-Farisi lava va nga cela swin'wana swa swihlovo. Nakona a va ri ni wanuna loyi a vitaniwa Heroda, nakona a ri mutivisi, mufumi wa tiko.

Kutani u tile a ta twa wanuna loyi o ka a nga mphutisiwanga hi tidinominexini ta vona. A ri muprofeta. Kutani a ku na muprofeta loyi a ri ni mhaka na dinominexini, kambe va yi vengile. Muprofeta loyi a sungula ku vula leswaku, "Mi nga sunguli ku tityela leswaku, 'Hi na Abraham loyi a nga tata wa hina,' hikuva ndza mi byela leswaku Xikwembu hi maribyi lawa xa swikota ku pfula vana va ya eka Abraham."

⁷² Kutani va vitanile ni vakulukumba leswaku vata n'wi yingisela. Kutani vakulukumba lava va n'wi tekele nsati wa makwerhu wa yena va n'wi susa eka yena, kutani a va nsati wa vona. Kutani xana wanuna yaloye u hume njhani a ya exikandzeni xa yena a fika a vulavula xana? A va ehleketa leswaku u ta xavelela, a ku, "Sweswi, nkulukumba, wena, u na xitulu xa kahle *lahawani*. Kutani u fanele ku... Ndzi tsakile hikuva u kwalahawani ku ta ndzi yingisela namuntlha."

Yohana ntsena u yile exikandzeni xa yena, a fika a ku, "A swi le nawini leswaku u nga n'wi teka." Xo sungula lexi a xi vuleke, u n'wi holoverile hi xidyoho xa yena.

⁷³ Wa vona, tidinominexini ti endla swidziva swa mati yo yima laha wanuna a nga hanyaka ni wansati, ni vavasati va vona va nga ya emahlweni, niku kerha misisi ya vona, ni ku ambala swo koma, ni swin'wana ni swin'wana, kutani va tivitana Vakreste.

Kambe Xihlovo xa xiviri, haleluya, xa Matimba ya Xikwembu, xi ngaka xi nga tshami lahaya, hikuva Ri swi sukumetela ehandle. "Ndzi Xihlovo xa Mati lama pfelelaka. Va Ndzi tshikile, va ya ticelela swihlovo swa vona."

⁷⁴ Sweswi, xihlovo xa mati lama pfelelaka, hikuma leswaku, xana i yini xihlovo xa mati lama pfelelaka xana? Hi kuma leswi xihlovo xi nga xiswona, sweswi xihlovo xa mati lawa ya pfelelaka i yini? I pitsi ra mati yo yima.

“Pitsi ra mati yo yima, i ncini sweswo, Makwerhu Branham?”

I pitsi leri minkarhi hinkwayo ri humaka ehansi ri sukumetelaka mati leswaku ya humela ehandle. Xa khuluka minkarhi hinkwayo. Xi ti sapota hi xoxe. Minkarhi hinkwayo xi basile xitlhela xi tenga, pitsi ra mati yo yima, xihlovo xa mati yo tenga. A xi fanga ni kuva na mati yo yima. Xa pfelela, xi tshamela ro ncina, xi tisa swilo swintshwa minkarhi hinkwayo, swi ya emahlweni, swi huma eka mphakelo wa swona. Xi humesa mphakelo wa xona eka—eka mubedwa wa xona, laha ku nga . . . hambi swi ri tano ku nga xihlovo xa mati lawa ya pfelelaka ya endlaka swidomudomu ya huma. Xi ti basisa hi xoxe; xi basile, xi tenga, mati lama tengeke. Xi ti sapota hi xoxe; a mi kali mi rindzela mpfula leswaku yi ta tata thangi ra xona. Minkarhi hinkwayo xi humesa maboboma, xi nyika mati ya xona xi ntshuxekile. A ma kali ma lava ku pompiwa, u xi rhendzelexa, u xi jikajikisa, kumbe ku xijoyina. Ntsena xova xihlovo xa mati lama pfelelaka.

⁷⁵ Ma swi tiva, loko mi teka swihlovo leswi swa khale, mi ta fanela ku handa mugero ni ku handa mugero ni ku handa mugero, ni ku pompa ni swin’wana, ku kuma nyana swimatana sweswo swo yima leswaku swi humela ehandle. Ha!

Kambe Xihlovo xa Mati lama pfelelaka Xa ma humesa, hi ku ntshuxeka, ku nga ri na ku pompa, ku joyina, ni swin’wana. Oho, ndzi tsakile hikokwalaho ka Xihlovo xexo! Ina, nkulukumba!

⁷⁶ A Xi kali xi lava xihluto eka Xona, ku kukuta tipharasayiti ti huma. Hikwalaho, Xi huma ehansi swinene hi ku enta, kwalahaya Ribiyeni, ku kondza laha ku nga ha riki na tipharasayiti kona.

A xi kali xi lava gume ra dyondzo eka Xona, hi swona sweswo, mafambiselo man’wana ya misava lawa ya nga endla hi vutlharhi bya ximunhu bya xidinominexini; ku mi byela, emahlweni ka dokodela wa miehleketo, hambi wa swi kota ku chumayila kumbe a wu swi koti. Xi hava na gume na rin’we eka magume lawa ya thyaka ya nembelelaka eka Xona. Xi ta ma susela ekule loko mi ma vekela kwalahaya. A mi nga swi koti ku swi endla sweswo. Xihlovo xexo xi humesa mabobomu, minkarhi hinkwayo. Loko mi nga vekela rin’wana ra gume eka xona, xi ta xi cukumetela ethelo kumbe rin’wana. A Xi na nkarhi wa gume ra xidinominexini.

⁷⁷ A xi kali xi lava filthara, a xi lavi xihluto, a xi lavi ku mpopiwa, a xi lavi ku jekiwa, a xi lavi nchumu. Ntsena xi

kwalahaya, xi humesa mabobomu. A xi tshembhelanga eka timpfula ta lokhali tita xi tata. *Timpfula* i “timpfuxelelo, laha Xihlovo xexo. . . Sweswo swi le ka Xihlovo xa Vutomi. “Laha Ntsumbu wu nga kona, hilaha magama ma nga kona.” A mi fanelanga mi pompa mpfuxelelo; a mi fanelanga ku pompa nchumu. Ntsena lexi mi fanelaka ku xi endla i ku ta eXihlobyeni. Xi tshama xi tele hi leswinene, mati lamo tenga, nakona a ku na makumu eka Xona. Xi tshamela ro humesa maboboma.

⁷⁸ A mi fanelanga ku ya exihlobyeni, mi ya ku, “Kunene, loko yina yi basisa na dulu, hi ta kuma swo nwa.” Wa vona? Mina, mina! Ku nga ri lexi. Xihlovo xexo xa mati yo yima xi le ku n’watekeni ka swilo swa kahle, mati yo titimela nkarhi hinkwawo. Mi nga ha tshembhela eka xona. A mi fanelanga mi ku, “Kunene, ndzi ta ya hala eka xihlovo lexi xa khale. Hi tolovele ku nwa eka xona, kambe i nkarhi wo leha xi nga se neriwa. Ndza mi byela, xi nga hava xi omile.”

⁷⁹ Yaleyo hi yona ndlela ya swin’wana swa swihlovo leswi swa mafambiselo lawa ya endleke hi munhu ma nga xiswona. Mi nga ha nghena, loko mi ri ni xin’wana lexikulu lexi xi yaka emahlweni, loko mi ri ni hlohlotelo lowu kulu wa swihundla swa ku xavisa swin’wana, kumbe—kumbe muxaka wun’wana wa swin’wana leswi swi ya ka emahlweni, ti phati letikulu ni swin’wana leswi swi ya ka emahlweni, mitlangu ya tibankho, ni tiphathi etindlwini tale hansi, ni hinkwaswo, mi nga ha kuma yindlu leyi hetisekeke.

Kambe laha mi yaka kona hilaha ku nga ni Xihlovo xexo xi humesaka maboboma, minkarhi hinkwayo, vanhu va kwalahaya va kuma swa kahle, va nwa mati lamanene lamo titimela. Mi nga ha tshembhela eka Xona! Mi ri, “A va vanga ni mpfuxelelo ku ringana malembe ya khume.” Loko mi hanya hi Xihlovo xexo, Yi tshama xi ri ni mpfuxelelo lowu wu yaka emahlweni.

⁸⁰ Tani hi leswi Welshman a swivuleke. Kumbe, nkarhi wun’wana loko va ha ri na mpfuxelelo wa Welsh lowu a wu ya emahlweni, a ku ri ni vakulukumba va States. Van’wana va Madokodela lamakulu ya swa Vukwembu va yile eka Wales, ku ya kumisisa ni ku vona leswaku hinkwaswo swilo leswi swi kwihi. Swingaleswi a va ambarile tikholoro ta vona, ni swidloko swa vona leswo tlhoma, nakona a va famba exitarateni.

Kutani lahawani ku ta xiphorisana, xi ri karhi xi ndiwuluta bili ya khale ya klab evokweni ra yena, xi ri karhi xi ba noti, “Enkoveni exihambanweni laha Muponisi wa mina a nga fela kona, ehansi kwalahaya ndzi rilela ku basisiwa evudyoheni; kwalahaya embilwini ya mina ku ni Ngati leyi ndzi nga yi kombela, a ku kwetsimi Vito ra Yena,” xi ri karhi xi famba hi xitarata.

Swingaleswi va teri, “Loyi u languteka a ri wanuna la khongelaka. Hi ta ya hi ya n’wi vutisa.”

Kutani va teri, “Nkulukumba!”

A ku, “Ina, nkulukumba?”

U teri, “Hi lahawani hi huma eUnited States. Hi va rhumiwa. Hi ta lahawani ku ta kambisisa mpfuxelelo wa Welsh, va ti vurise xisweswo. Hi Madokodela ya swa Yukwembu, kutani hi lahawani ku ta wu langutisa.” A ku, “Hi lava ku tiva laha mpfuxelelo wu nga kona, nilaha wu nga khomeriwa kona.”

U teri, “Nkulukumba, u fikile. Hi mina mpfuxelelo wa Welsh.” Amen! “Mpfuxelelo wa Welsh wu le ka mina. Lahawani hi laha wu nga kona.”

⁸¹ Swi hi ndlela yaleyo loko mi hanya hi Xihlovo xa Mati lama pfelelaka. Xa pfelela minkarhi hinkwayo, xi humesa maboboma nkarhi hinkwawo, minkarhi hinkwayo na hinkwayo. A ku na makumu eka Xona. Ku ngari ku, “Ya langutisa loko kuri ni mati, loko a hi ri ni mpfula lahawani ku nga ri khale,” a hi swona sweswo. I Xihlovo xexo xa Mati lama pfelelaka. Tani hi laha ndzi nge, Xi nyika Mati ya Xona mahala.

⁸² A wu kali u vekela gume eka Xona, ku kumisisa; magume man’wana ya dyondzo, hikuva mi nga ha n’wi rhuma ku ya chumayila, ni ku vona loko a kota ku hlaya marito kahle, niku mavula kahle, loko a tirhisa maviti ni masivi, niku ya emahlweni, ni mahlawuri. Votala va vona a va switivi hambu kuri ku switiva leswaku hi vona va mani, kambe u le ku hanyeni eXihlobyeni ku fanana, wa vona, ku fanana.

⁸³ A xi fanelanga xi tshembhela eka timpfula ta lokhali, ku xi tata, kumbe mimpfuxelelo ya lokhali, eka xona. A xi fanelanga ku endla sweswo, hikuva Matimba ya xona niku tenga ka xona swi le ka xona. Kwalaho hilaha Rito ri nga kona, Matimba lawa ya nga ya Xona N’winyi! Loko munhu a nga Ri amukela embilwini ya yena, Ri ni ku tenga ka Rona. Ri ni matimba ya Rona. Ri kahle eRitweni hi Roxe, ri pfelerisa Vutomi byi ya emahlweni.

⁸⁴ Israel loko ri nga fambela ekule na Rona, a va ta nghena ekhombyeni. Minkarhi hinkwayo loko va fambela ekule na Rona, a va nghena ekhombyeni.

Swa fana ni leswi hi swi endlaka sweswi. Loko mpfuxelelo wu fambela ekule Sweswo, swingaleswi a swi kahle. Ri ticelela swihlovo swin’wana swa rona, kutani, kumbe swihlovo swin’wana swa mati yo yima, kutani swi fambisa xisweswo.

⁸⁵ Kambe a Xi va pfuna hi minkarhi hinkwayo. Ku dumaduma eLwandle ro Tshwuka, swingaleswi loko va dumadumerile...Hambu swi ri tano, eka swilo sweswo

hinkwaswo, a Xi xitshembhisile, a xi va endlerile xitshembhiso. A Xi tava xi va tlheriserile endzhaku kwalahaya, hi ndlela leyi hi nga ta swi langutisa ha yona; kambe Xi va tshembhisile ku va yisa lahaya.

Xana Xi endlile yini? Vona vana va-Israel, Xi va tiserile Langavi ra Ndzilo ni swin'wana, ku tiyisisa, muprofeta wa vona. Kutani swi va rhangerile ku ya elwandle. Kutani, minkarhi hinkwayo, ku ni khombo loko u lwisana na Rona. Kutani lahawani ku ta Faro ni vuthu ra yena. Kutani xana ma swi tiva leswi Xikwembu xi nga swi endla? Ntsena Xi pfurile ku tshwuka kwaloko, xihlovo xa mati lama yimeke.

Lwandle ra ku Fa i nchumu lowukulu lowu wu nga fa swinene emisaveni. Ri file hakunene. Ri ni mati lama yimeke. Ku hava lexi nga hanyaka eka rona.

Kutani Xi ri pfurile niku va ntshunxa, etlhelo lerin'wana. Xi va yisile laha va nga taka va nga ha bohiwi hi nchumu wo kotisa walowo.

⁸⁶ Emananga, va kumile leswaku va ngaka va nga ha tshembheli ma thangi; a ma omile. Va kuma leswaku, va ya eka nsele wun'wana wa mati va ya eka wun'wana. Loko va ha ri emananga, a va sikela ro fa, hikokwalaho ka mati yo nwa. Kutani a va taya eka thangi leri lahawani, ku nga xidan'wana; a xi omile. Va yile endzhawini yin'wana; a ku omile. Ntsena a va nga ha ehleketi leswaku va nga ha kuma kun'wana laha va nga nwaka.

Kutani swingaleswi endzhawini leyi hakanyingi yi nga tolovelekangiki eka mananga hinkwawo, va kumile mati. A mari eribyeni. A ma ri eribyeni. Ndzhawu leyi hakanyingi yi nga tolovelekangiki leswaku munhu a nga kuma mati, a ma ri eribyeni lero oma exikarhi ka mananga. Kambe, ma swi vona, Xikwembu xi endla swilo swo fana ni sweswo. Endzhawini leyi nga nga tolovelekangiki, hakanyingi hi ndlela leyi nga toloveriwangiki. Sweswo hi leswi hi nga na swona minkarhi hinkwayo.

⁸⁷ Va ehleketa leswaku mi fanele ku va ni tidinominexini letikulu, na vona, ni ku va pfumelela vata na vona va tava ni xigayo lexikulu, ni kuya emahlweni, niku kuma magidi lawa ya nga ta tirhisaneke, ni hinkwaswo hi ndlela *yaleyi*, ku va ni mpfuxelelo.

Nkarhi wun'wana Xikwembu xi tirhisa munhu lontsongo wa khale loyi a nga switiveki hambu kuri ku tiva ti ABC, ni le xikarhi ka ntlawa wa vanhu lava nga dyondzangiki lava swi va nonohwelaka ku tiva voko ra vona ra xinene eka leri ra ximatsi, Xi ta pfuxa mpfuxelelo lowu nga ta ninginisa misava. Xi swi endlile hi nkarhi wa Yohana. Xi swi endlile hi minkarhi ya vaprofeta. Kuhava na un'we wa vona, tani hilaha hi swi tivaka, loyi a dyondzekile, kambe Xikwembu xi nga ha va khoma ni ku endla swin'wana ha vona.

⁸⁸ E ka Ribye leri ku humile mati. A Xi ri Ribye. Nakona Xi lerisile Ribye leri, nakona a ri fanele ku biwa. Kutani Xi humesile mati lamo tala yo tenga, yo basa, mati yo tenga eka un'wana na un'wana loyi a nga ta nwa. Xi ponisile hinkwavo lava va nga ta nwa eka Rona. Swi fambelana swinene na Yohana 3:16.

...Xikwembu xi rhandzile misava swonghasi, xi ko xi nyika N'wana wa xona la nga tswariwa a ri swakwe, ...leswaku un'wana ni un'wana loyi a pfumelaka eka yena a nga tshuki a lova, kambe a va ni vutomi lebyi nga heriki,

⁸⁹ Xikwembu xi bile Ribye lero, eXihambanweni. Ku avanyisiwa ka hina ku le ehenhleri ka Yena, leswaku ha Yena ku nga ha ta Moya wa Vutomi lowu wu nga ta nyika n'wina na mina Vutomi lebyi nga Heriki. Xexo i xifaniso lexi hetisekeke xa Rona, kwalahaya emananga lawa.

⁹⁰ A va kalanga va ma ka, va cela, va ma pompa, kumbe swin'wana; ntsena va vile xiave xa ndlela ya Xona leyi xi nga yi tisa, mahala. Loko, a va nga fanelanga ku ma cela exidan'wanini. A va nga fanelanga ku ma ka hi bakiti. A va nga fanelanga ku va ni xipelupelu ku ma kuma. Ntsena a va fanele ku va xiave xa swona.

Kutani hinkwaswo leswi a swi ri kwalahaya swi lahawani sweswi. A mi fanelanga ku joyina swin'wana. A mi fanelanga ku khizama e altari mi tirha swin'wana, mi swi pompa. A mi fanelanga kuvula rito mi vuyeleda ni ku vuyeleda, ku kondza mi va ni ku kanganyiseka ka ririmi. Nchumu wun'we ntsena lowu mi fanelaka ku wu teka i ku va na xiave na Xona, hi ku ntshuxeka, i ndlela leyi nyikiweke hi Xikwembu. A ku na ku pompa, a ku na ku sukumeta, a ku na nchumu; ntsena Ri tekeni, hi ku ntshuxeka. Kuhava lexi mi fanelaka ku xiendla; ntsena vanani xiave xa Rona. Hi swona sweswo, ntsena pfumelani eka Rona. Sweswo hi leswi ndzi nga swi vulaka ha rona.

A va nga fanelanga ku ma koka. A va nga fanelanga ku ma cela. A va nga fanelanga ku nkhisama ni ku rila vusiku hinkwabyo, hikwalaho ka wona. Ntsena va vile xiave xa wona; a ri biwile ni ku tilunghisela. Hi swona sweswo.

⁹¹ Ndzi langutile wanuna sweswi, loyi a tshameke endzhaku ka kamara lahawani. Ndzi tsundzuka loko ndzi n'wi byela leswaku, exitlatini xa dulu ra khale siku rin'wana, hi xidyelo.

Kutani a ku, "Kambe a ndzi kahle."

⁹² Ndzi ku, "Ndza swi tiva leswaku a wu tano." Kutani ndzi ku, "A ndzi tano, hambu swi ri tano." Kambe ndzi ku, "U languta eka leswi u nga xiswona. Kutani yima ku langutisa leswi u nga xiswona, kutani u languta leswi Yena a nga xiswona."

U teri, “Loko ntsena ndzi nga tshika mafole lawa, Makwerhu Branham, ndzi—ndzi—ndzi nga va Mukreste.”

⁹³ Ndzi ku, “U nga ma tshiki. U le ku ringatani ka kuva kahle swingaleswi tana eka Yena. A nga telanga ku ponisa vanhu lavanene; U tile ku ta ponisa vanhu lavo biha lava va swi tivaka leswaku va bihile.”

A ku, “Kunene . . .”

Ndzi ku, “Yingisa, a wu swilavi ku ya etiheleni, a hi swona xana?”

A ku, “Ee.”

⁹⁴ Ndzi ku, “Kunene, a wu swi lavi. U file leswaku u nga yi.”

Ndzi ku, “Xana ndzi fanele ku endla yini xana?”

Ndzi ku, “Ku hava. Ntsena sweswo swi olovile.”

A ku, “Kambe loko ndzi nga kala . . .”

⁹⁵ Ndzi ku, “Kwalaho wa famba, u tlhelela eka sigarete ya leyo nakambe. Tshika ku ehleketa hi sigarete ya leyo. Ntsena tsundzuka, ehleketa ha Yena, leswi A swi endleke, leswi A nga xiswona; ku nga ri leswi u nga xiswona. A wu kahle; nakona a wu kalanga u va kahle, nakona a wu nga pfuki u vile kahle. Kambe, leswi A nga xiswona, hi Yena a ri Yexe!” Kutani ndzi ku, “Sweswi, nchumu wun’we ntsena lowu u fanelaka ku wu endla; loko A teka ndzhawu ya wena ehansi lahaya, ntsena hi ku ti rhandzela amukela leswi A swi endleke. Nchumu wun’we ntsena lowu u faneleke ku wu endla i ku swi amukela.”

“Hikwalaho ka yini,” a ku, “sweswo swa olova. Ndzi ta swi endla sweswo.”

⁹⁶ Ndzi ku, “Hi lexi xinkobyana lahawani.” Wa vona? Ndzi n’wi yisile lahawani kutani ndzi n’wi khuvula hi Vito ra Yesu Kreste.

Van’wana va vanhu va yena va tshamile lahawani, nakona ndza—ndza switiva va twa swi nga va khomi kahle eka mina kuva ndzi swi endla sweswo, kambe ndzi tiva leswi ndzi swi endlaka. Ndzi swi vonile emunhwini swin’wana swa xiviri. Ndzi nga ha swivona sweswo, kutani ndzi n’wi tekile ndzi n’wi khuvula hi Vito ra Hosi Yesu.

Kutani, loko hi tava hi swi endlile sweswo, a swi tekangaka nkarhi endzhaku ka sweswo ndzi yile endlwini ya n’wana wa yena. Hi vonile xi—xi xivono xa nsinya lowu tshovekeke endzhawini yin’wana, ni wanuna loyi a weke, a kumeka a tshoveka nhlana wa yena. A yisiwa exibedlhele. Kutani hi yusiku byebyo Hosi yi hlavuterile, eka mina, leswaku sweswo a kuri makumu ya tisingarete.

Swingaleswi hi siku leri tlhandlamaka u lavile tisingarete tin’wana. Ndzi ku, “Ndzi ta n’wi xavela khathoni ni n’wi yisela

yona. Ntsena mi hlalela mi vona, masiku ya yena ya sigarete ya herile.” A nga ha kalanga a zaha kusukela, niku lava rin’wana. Xikwembu!

⁹⁷ Wa vona, xo sungula lexi mi faneleke ku xi endla i ku ta eXihlobyeni xexo. Mi fanele ku ta eMatini walawo, tekelani enhlokweni leswaku ku hava lexi mi nga xi endlaka. Hi leswi A nga mi endlela swona. A mi fanelanga ku cela; a mi fanelanga ku ma pompa ma huma; a mi fanelanga ku tshika *leswi*; a mi fanelanga ku tshika *sweswo*. Nchumu wun’we ntsena lowu mi nga wu endlaka i kuya kwalahaya mi ya nwa. Hi swona hinkwaswo. Loko mi ri na torha; nwanani!

⁹⁸ Sweswi, Yena a ri Ribye. Xikwembu xi hi berile Yena, kutani U hi nyikile ku tenga hi ntalo, mati lamo basa. Xa swi endla hambi swi ri tano, namuntlha, eka un’wana ni un’wana loyi a nga ta pfumela. Leti i tintswalo ta Xona, ha kunene, eka hina, vanhu va Xona.

⁹⁹ Ku ni leswi swi fanaka ni swa kwalahaya, tani hi vanhu va namuntlha, va tilulamiserile ku amukela leswi va nga swi kumaka, kambe a va swilavi ku nyika xikhongelo hi ku tlherisela. Israel a ri tilunghiserile ku—ku nwa eribyeni sweswi, kambe a va nga swilavi ku nyika Xikwembu xikhongelo xa Xona lexi a xi ri xa Xona.

¹⁰⁰ Nakona minkarhi hinkwayo Xi hi nyika xikhongelo. Ma swi tiva, hi ngaka hi nga hefemuli ehandleni ka Xona. Hi ngaka hi nga hefemuli ehandleni ka xikhongelo xa Xikwembu. Hi yona mhaka hi tshembheleke eka Xona. Nakona, hambiswiritano, swi hi tshova hi va kambirhi loko hi ringeta ku swi endla, loko hi fanela ku Xi endlela swin’wana. Xa hi kombela leswaku hi endla swin’wana, fambani mi ya vona un’wana, fambani mi ya khongelela un’wana, fambani mi ya pfuna un’wana, hakanyingi swa hi tshovelela, ku swi endla. Kambe a hi swilavi ku Xi endlela swin’wana ha xikhongelo.

¹⁰¹ Xivilelo xa Xona a kuri leswaku, “Va Ndzi tshikile, Rito; kutani va amukerile xihlovo lexi handzukeke, ematshan’wini. Va amukerile. . . Va Ndzi tshikile, Xihlovo xa Vutomi, Xihlovo xa Mati ya Vutomi; kutani va ti navelela ku nwa eka xihlovo xa mati lama yimeke.” Xana mi nga swi anakanya sweswo xana?

¹⁰² Mi nga ha n’wi anakanya munhu sweswi, leswaku, *lahawani* hi lexi xihlovo lexi pfelelaka ntsena xi le ku humeseleni ehandle leswa kahle, mati ya le ribyeni ro basa, lawa ya humaka embilwini ya matamba, ehansi lahaya emibedweni ya sava, ni kuya emahlweni, ntsena ma titimela niku va lamanene hilaha ma nga vaka ha kona; nakona ku tlula ku nwa eka xihlovo lexi nga lahaya, lawa ya nga hlantswa ehenhla ka dulu, ni ku halaka, ni hinkwako ehandle ka muako ku rhendzeleka hi ndhawu? Kutani ma yisiwa exihlobyeni

lahaya, laha makhukhuri ya mati ya yaka kona, ya huma edulwini, matala ni swivala, ni hinkwaswo swi khulukela exihlobyeni, kutani hi lava ku amuke- . . . mi nga va mi nwile eka xona mi nga se ya eka xihlovo lexi pfelelaka xana? Ku nga hava kuri ni leswi swi nga hoxeka emiehleketweni ya munhu. Hi swona sweswo.

¹⁰³ Kutani loko wanuna kumbe wansati a nga teka dinominexini eka leswi va nga yimisa xiswona, leyi yi nga ta pfumelela misisi yo bobiwa, va ambala swo koma, va ti phontsa, hinkwaswo swa muxaka wolowo, ni muxaka wun'wana wa— wa nongonoko, ni hi nkwaswo leswi swi yaka emahlweni, niku ya boricha ekhikhetheni, ni—ni hinkwaro thyaka lero leri ri humaka kwalahaya, kutani va tiambexa sweswo; ni ku fana ni sweswo swo antswa loko va endla fexeni ya khale ya Rito ra Xikwembu leri ri celaka ehansi ni ku hakula, ni kuva ri endla vanhwana lava va humaka eka vavasati, ni kuva va teka va ti endlela swiambalo swa kahle ni kuva ni maendlelo ya kahle, va teka tisigarete na mafole, niku tseketsela niku rhukana, ni ku hembra niku yiva, swi va ekule na n'wina, ni misava yi va ekule na n'wina, kutani ri mi nyika Swin'wana leswi enerisaka hi ku hetiseka. Hikokwalaho ka yini wanuna kumbe wansati a ya eka nchumu wo kotisa walowo ku ya chaveleleka xana? Xana mi nga chaveleleka njhani eka sweswo?

¹⁰⁴ Xana mi nga ma kuma njhani mati yo tenga eka xihlovo xa mati yo yima xana? Hikokwalaho ka yini munhu. . . . Loko munhu a nga ya exihlobyeni xa mati lama yimeke ku ya nwa, loko kuri ni xihlovo lexi pfelelaka, mi nga ku, “Ku ni swin'wana swi nga hoxeka emiehleketweni ya munhu ya yaloye.”

Kutani loko wansati kumbe wanuna a nga ya endhawini yo fana ni ya leyo kuya kuma ku chaveleleka, ku ni swin'wana swa ximoya leswi swi nga hoxeka hi munhu yaloye. A va ri lavi Rito. Swi kombisa leswaku ntumbuluko wa vona wa hari wa ntlambya, kumbe xivuluvulu, kumbe swin'wana, hi swona sweswo, swin'wana swa ntumbuluko walowo lowu wu rhandzaka xidziva xa mati yo yima, hikuva muxaka wa swona a hi ku hanya exidziveni xa Mati lawa ya tengeke. Va ngaka va nga swikoti; i Mati yo tenga. Va ngaka va nga swikoti.

¹⁰⁵ Sweswi, xivilelo a xiri xa ku, “Va Xi tshikile.” Kutani na namuntlha va ha endla swo fana.

Sweswi langutani wansati exihlobyeni. Kunene, a tile exihlobyeni xa Yakob, kutani a kuma mati kwalahaya minkarhi hinkwayo, exihlobyeni xa Yakob. Kambe xihlovo xa Yakob, dinominexini, hi ta xi vitanisa xiswona, hikuva u cerile swinharhu swa swona; ni lexi n'wana u xi cerile. Sweswi, u ni xitori lexikulu. U teri, “Sweswi, tatana wa hina u cerile

xihlovo lexi, Yakob. U nwile eka xona, ni tihomu ta yena ti nwile eka xona, ni hinkwaswo. Xana sweswo a swi kahle ku ringana xana?”

¹⁰⁶ A ku, “Kambe mati lama u makaka kwalaho, ma ta ku khomisa torha nakambe, u fanele ku vuyela endzhaku lahawani u ta ma kuma. Kambe,” a ku, “Mati lama Ndzi ku nyikaka wona i Xihlovo, Ghizara yi ma n’watseka ya suka endzeni, nakona a wu nga ha tlheli u vuya lahawani ku ta Ma ka. Ma tava eka wena.”

¹⁰⁷ Xiyisisani. Kambe loko a tava a swi vonile leswaku Xihlovo xa Matsalwa xi vulavurile na yena, hi xikombiso xa Matsalwa lexi a langutele xona, u tshikile mafambiselo ya lawa ya xidinominexini xa Yakob kutani a nga ha a tlhelelanga eka xona nakambe, hikuva a kumile Ribye ra xiviri. Wa vona? U tsutsumerile edorobeni. A hetile hi xidyoho. A nga ha ri wansati loyi a nyamile. U teri, “Tanani, mi vona Loyi ndzi nga n’wi kuma, Wanuna Loyi a ndzi byelege swilo leswi ndzi swi endlaka. Xana Loyi a hi yena Krete la fanaka xana?” U... Xihlovo xexo xi nga hava xi ri kahle; xi tirherile xikongomelo xa xona. Sweswi a ri eka Xihlovo xa ntiyiso. Xihlovo a xi ri kahle ku kondza ku pfuriwa Xihlovo xa ntiyiso. Kambe loko Xihlovo xa ntiyiso xi fika, xihlovo xi heleriwile hi matimba ya xona. U kumile leswaku ku ni ndzhawu ya kahle ya ku nwa eka yona.

¹⁰⁸ Nakona ku ni ndzhawu ya kahle. Ku ni ndzhawu ya kahle, kutani yaloye yi le ka Krete. Eka Mukwetsimi Yohana 7:37 na 38, Yesu u teri, ekuheteleleni ka nkhuvo wa titabernakele, “Ku nga ku loko munhu a ri ni torha, a te ka Mina, a nwa.”

Hinkwavo a va ri eku tsakeni. A va ri ni mati lama a ma n’watseka ehansi ka altari, kutani—kutani kwalaho a va ri eku nweni eka leswi, va ri eku tlangeleni, ka—ka nkhuvu. Kutani va teri, “Va tata wa hina va nwile eribiyeni ra ximoya emananga.” Wa vona, va ticelerile xihlovo lexi xi nga xa vona, mati man’wana yo yima va nga ya mpompa kun’wana ehansi, kutani va ma n’wetseka ehansi ka tempele kwalahaya. Kutani hinkwavo va ta rhendzela mati lawa va nwa, kutani va ku, “Malembe lama nga hundza, vatata wa hina va nwile emananga.”

Yesu u teri, “Ndzi Ribye leri a ri ri emananga.”

Va teri, “Hi dyile mana lawa a ya huma Tilweni, kutani Xikwembu xi ma nisile.”

¹⁰⁹ A ku, “Ndzi Mana ya lawa.” Yena, Xihlovo xexo, a xi yimile exikarhini ka vona. Vuswa byebyo bya Vutomi a byi yimile exikarhi ka vona.

Kutani hambu swi ri tano a va nga Byi lavi. A swi va antswela va va na xihlovo xa vona; hikuva, *lexi* xi endlwile

hi munhu, nakona Xikwembu xi rhumele Xexo. Sweswo hakunene swi hambanile. Va ticelerile swihlovo leswi nga swa vona!

¹¹⁰ A ku, “Ku nga ku loko munhu a ri ni torha, a te eka Mina, a nwa.” Hi Yena Xihlovo xexo.

Kutani ku kotisa loko Matsalwa ma te, “Ekhwirini ra yena ku ta khuluka milambu ya Mati lama pfelelaka.” Oho, hi Yena xihlovo xexo xi pfelelaka! “Ekhwirini ra yena, kumbe endzeni ka yena, ku ta khuluka milambu ya Mati lama pfelelaka.”

¹¹¹ Hi Yena Ribye leri a ri ri. . . Rero a ri ri Ribye ra Hagar, hi nkarhi wa manhlomulo; loko n’wana wa yena a lava ku fa, loko a hlongoriwile emixaxeni, kutani a ri ehandle lahaya ni Ishmael lontsongo. Mati ya yena, exihlobyeni xa yena lexi a famba na xona, a ma herile. Kutani u etlerisile Ishmael lontsongo ehansi; kutani a ya emahlweni, a khinsama, a rila, kutani, oho, hikuva a nga swilavi ku vona n’wana wa yena loko a fa. Kutani xikan’we-kan’we, Ntsumi ya Hosi yi vulavurile na yena, kutani a kuma Beer- . . . Beersheba, xi-xi xihlovo lexi a xi khuluka, kutani na namuntlha xa ha khuluka. A ri Beer-Beersheba wa Hagar, Ribye leri a ri ri kwalahaya mananga.

¹¹² Ri yimile kwalahawani eka Xihlovo lexi nga tatiwa hi Ngati, hi siku lero, ri yimile kwalaho tempeleni. [Xivati lexi nga riki na nchumu eka thepi—Muhleri.] . . . hi nkarhi wa bubutsa. Eka Zakariya ndzimana ya vu13, A ri Xihlovo xexo xi fununguriweke eka yindlu ya Davida, ku ta basisa, niku (xidyoho) basisa xidyoho. A ri Xihlovo xexo. Kutani eka Tipisalema 36:9, A ri Xihlovo xa Vutomi xa Davida. Wa ha ri Xihlovo xexo endlwini ya Davida.

Nakona Wa ha ri muphati, embilwini ya yena kwalahaya. Xiphato xi ri:

Ku ni Xihlovo lexi tatiweke hi Ngati,
Leyi yi humaka eminsiheni ya Emanuel,
Loko vadyohi va nyupela endhambhini,
Ku suka hinkwawo nandzu wa swinaka swa vona.

Hi Yena Xihlovo xexo xa Vutomi, Xihlovo xa Mati. Hi Yena Rito ra Xikwembu.

¹¹³ Vanhu va minkarhi leyi ya makumu va N’wi tshikile, yena Rito ra ntiyiso, Mati ya Vutomi; kutani va ti handerile swihlovo swa xidinominexini; kutani, nakambe, va handile, va cela!

¹¹⁴ Kutani sweswi hi kuma leswaku, a va ri ni swihlovo leswi handzukeke. Kutani swingaleswi xihlovo lexi xi tatiwile hi switsongwa-tsongwani leswi nga pfumeriki, hi vutinyungubyisi lebyi nga riki na ripfumelo, minongonoko ya tidyondzo, ni swin’wana ni swin’wana, leswi swi kanetanaka ni switshembhiso swa Xikwembu. Hi vona vakanakani va Rito.

¹¹⁵ Sweswi, swihlovo leswi va nga na swona, Bibeke yi teri, a swi “handzukile.” Xihlovo lexi *handzukeke* i xihlovo lexi xi “pfutaka,” makhuluka ma huma. Xana ma endla yini? Ma khuluka ma ya eka tlhivi ra vukhongereri leri ri vitaniwaka World Council of Churches. Kutani kwalaho hi laha xihlovo lexi nga handzuka xi va yisaka kona, hinkwavo hikokwalaho ka kuva va N’wi tshikile, kutani va . . . Xihlovo xa Mati lawa ya pfelelaka; kutani va endla swihlovo leswi.

¹¹⁶ Va le ku celeni ka mafambiselo ya tiseinari letikulu ni ku dyondza, dyondzo, ni kuya emahlweni. Walowo i muxaka wa swihlovo leswi va nga eku swiceleni namuntlha, leswaku munhu u fanele a va a ri na Ph.D., kumbe LL.D., kumbe Bachelor of Art, kumbe swin’wana, loko a nga si ya eku chumayeleni. Swihlovo leswi nga tatiwa hi ntivo-vukhongereri lebyi byi nga endla hi vanhu. Va va yisa eka swikolo leswi leswikulu ku ya dyondzela, kutani kwalahaya va va tlhavela ntivo-vukhongereri lebyi byi nga endliwa hi munhu, kutani va va rhumela ehandle va ri na sweswo. I siku rihi leri hi hanyaka eka rona, ra swihlovo leswi endliweke hi vanhu! A ku na khombo . . . A swi hlamarisi loko nchumu wu va lowu wu—wu nhunhwaka, oho, mina, swi hi kokwalaho ka kuva vanhu va nwa eka xona.

¹¹⁷ Kutani loko vanhu va lava ntsako namuntlha, xana va endla yini? Vanhu, ematshan’wini ya ku amukela ntsako wa Hosi, va hundzulukela eka vudyoho, ku titsakela kona. Vanhu lava va ya ka ekerekeni niku koxa leswaku i malandza ya Krete, loko va kumeka va chunhwa nyana va layita sigarete. Kutani loko va—loko va lava ku—ku titsakisa, va khomelela eka swiambalo swa vona swa vugangu va ya ehandle va ya tsemelela byanyi laha vanhu va hundzaka hi kona, leswaku va va bela makhwela. Va endla hinkwaswo leswaku va duma. Va lava ku languteka tani hi timuvhi sta. Wa lowo i ntsako wa vona.

Loko, Yesu a te, “Ndzi ku enela ka vona.”

Xivangelo xa kuva va ya eka sweswo, swi hi kokwalaho ka kuva va nga swilavi ku nwa eka Xihlovo xexo. Va Xi hundzulukerile. A va swilavi ku nwa eka Xona. Va ti joyinisile vona hi voxe eka maendlelo man’wana ya mafambiselo lawa ya nga endla hi munhu, xihlovo xin’wana lexi nga tala hi muxaka hinkwawo wa swilo swa mati yo yima, leswaku va nga ha famba tani hi sweswo.

¹¹⁸ Tolo, a hi ri ni vana enambyeni. Ndzi pfumela leswaku a kuri mixo wa Muqhivela. Hi rhelerile; Billy a ri eku njoveleni ebyatsweni. Kutani hi yisile vana, xintukulwana xa mina xa xifanyetana na vona, nhwana wa mina, ni xifanyetana xa mina, kutani hi yile enambyeni ku ya—ya khandziya byatso. Mi ngaka mi nga swikoti ku khandziya byatso enambyeni, ni

thyaka, ku nyakapfala, vanhu va xikhuvi kwalahaya nambyeni, va nga ambalanga xiphemu xin'wana ni kuya emahlweni. Byatsu byi chayeriwile ku nga ri hi hina, ntlawa wa khume mbirhi wa lava ntsongo-, swifanyetana swa khume mune wa malembe hi vukhale, xin'wana ni xin'wana xi ri na xikotikoti xa biya emavokweni ya swona, na sigarete. Va swi vitana "ku titsakisa" sweswo. Oho, mina! Xana misava leyi yi tava kona kufikela rini, ni maendlelo yalawa xana?

¹¹⁹ Swingaleswi va tintshuxile eka miehleketo ya leswaku loko va fa va taya etiheleni, lexi va xi endlaka, va ya va ya joyina xin'wana xa swihlovo leswi endlaweke hi vanhu. Swingaleswi muxaka wun'wana wa vanhu va nghena eka xihlovo xexo. A vo va nchumu kambe ntlawa wa lama nga basangiki, swivuluvulu swo thyaka swa misava. Kutani va tixaxameta na sweswo hikuva, tani hi mana wa mina wa khale la nga dyuhala u tolovele ku vula leswaku, "Swinyenyana swa tisiva to fana swi tihaha kun'we." Va nga ka va ngati eXihlobyeni va ta basisiwa eka vutomi byebyo bya vudyoho. Va lava ku hanya kwalahaya, hambi swi ri tano va ha khomile vumbhoni bya leswaku hi vona Vakreste. Hikokwalaho ka yini? Va N'wi hundzulukerile, Xihlovo xa ntiyiso xa ntsako, Vutomi, Vutomi lebyi nga hetiseka niku eneriseka. Xexo hi xona xivangelo xa kuva va swi endlile, hikuva xexo va lava ku xi joyina. Va ni vanhu van'wana kwalahaya lava pfumelaka eka swilo sweswo.

¹²⁰ Lahawani ku nga ri khale ngopfu, mina na Makwerhu Fred, na Makwerhu Tom, ntlawa wa hina hi yile ekerekeni ya Baptist edorobeni ra Tucson, ku ya vona loko hi leswaku a hi nge kumi swin'wana leswi swi nga hi nyikaka vutitwi nyana byo tenga. Kutani muministara u vule swin'wana hi vanhu va le Egipta, loko va ta suka a va dya galiki ni kuya emahlweni, va lavile ku tlhelela endzhaku nakambe ku ya dya sweswo. U teri, "Sweswo hi swin'wana leswi swi fanaka ni vanhu va namuntlha."

Kutani, hina, un'wana na un'wana u teri, "Amen!" A ndzi kalanga ndzi vona ntlawa wo tano! Kereke hinkwayo yi hlulekile ku vona muchumayeri kutani yi langutile endzhaku ku vona leswaku i mani loyi a nge "amen." A swi languteka swi va chavisele ro fa. A va nga swi tivi leswaku a kuri yini.

Loko, Davida a te, "Endlani huwa ya ntsako eka Hosi. N'wi dzuniseni hi tiharipa! N'wi dzuniseni hi tipisalema! Hinkwaswo leswi hefemulaka a swi dzunise Hosi. Kutani dzunisani Hosi!" Xikwembu xi ti tsakela eka vanhu va Xona. Mi nge lava va dyondzeke, va ku, "Amen," loko ku vuriwa xin'wana na xin'wana xa kahle.

¹²¹ Hikokwalaho ka yini mi nga suki eka mafambiselo lawa na swihlovo leswi swa misava, mi ya eka mafambiselo lawa ya tshembhekeke ya Xikwembu, laha ku nga xihlovo lexi

pfelelaka, Yesu Keste xana? Hikokwalaho ka yini mi nga hundzukeli eka Xona, laha Xikwembu xi hi nyikaka ntsako hi ntalo, ntalo wa hina lowu hi nyikiwaka eku dzuniseni, ntalo lowu hi nyikiwaka wona eka ku enerisiwa? Ku miyela ka ku rhurhumela ka mina ku huma eka Xikwembu.

Loko ndzi handzuleriwile, ndzi kuma ku eneriseka ka mina eka Kreste, ku nga ri eka sigarete, ku nga ri eka swilo swa misava, ku nga ri ku joyina mikhuva yi n'wana; kambe hi ku N'wi kuma, hi Rito leri tshembisiweke leri A nge teri, "Loko Ndzi famba, Ndzi ta vuya nakambe ndzi tava na n'wina." Ndzi kuma ntsako wa mina eka sweswo. Hi Yena Ntsako wa mina.

¹²² Va vula namuntlha, hi ku joyina swilo leswi ni hi ku endla World Council of Churches leyi, leswaku va ya eku endleni ka ndzhawu yo antswa yo hanya eka yona. Ku ya hi mavonelo ya mina lawa ya tshembhekeke, va ya endla ndzhawu yo antswa leyi va nga ta dyohela eka yona. Ntsena sweswo... Nchumu hinkwawo i vudyoho, hi mukhuva wun'wana; ku nga ri ku hanya eka byona, kambe ku fela eka byona. Va endla ndzhawu leyi va nga ta dyohela eka yona—ku dyohela eka yona, ematshan'wini ya ku hanya eka yona.

¹²³ Xin'wana ni xin'wana, lexi nga ehandle ka Yesu Kreste ni Rito ra Yena ra Vutomi, i xihlovo lexi handzukeke. Xin'wana ni xin'wana lexi xi ringetaka ku yima exiynweni xa Rona; xin'wana ni xin'wana lexi mi ringetaka ku xi endla leswaku xi mi tisela ku rhula, xin'wana ni xin'wana lexi mi ringetaka ku xi endla leswaku xi mi tisela ku chaveleleka, ntsako wa muxaka wun'wana ni wun'wana lowu mi wu amukelaka kusuka eka swin'wana, tani hi ku yima exiynweni xa Leri, i xihlovo lexi handzukeke lexi nga tala hi thyaka. Xi hi nyika ku eneriseka loku nga hetiseka.

¹²⁴ Ndza tsundzuka lahawani, eka swimumu swo hlaya leswi nga hundza, ndzi humile hi rivanti ra le mahosi. A ku ri ni mutlangi wa khirikhete lontsongo kwalahaya loyi a nge teri eka mina, a ku, "Wa swi tiva, xivangelo xa kuva u vulavula hi vavasati hi ndlela yaleyo, hi ku ambala swo koma ni swin'wana," a ku, "hikuva i mukhalabya." A ku, "Xexo hi xona xivangelo xa kona."

Ndzi ku, "Languta lahawani. Xana u ni malembe mangani wena?"

A ku, "Makume mbirhi-nkombo."

¹²⁵ Ndzi ku, "Loko ndza ha ri na malembe yo tala ya le hansi ka wena, a ndzi chumayela swo fana."

Ndzi kumile Xihlovo lexi enerisake. Hi Yena ku averiwa ka mina. Amen! Ntsena loko Xa ha nyika sweswo, sweswo swi sasekile. Sweswo i—sweswo i swa mina...Byebyo i vutshila

bya mina, byi nga languta eka Yena, le byi nga hlalela ntirho wa mavoko ya Yena niku vona leswi A nga ku swi endleni. Ku hava xihlovo xin'wana lexi ndzi xi tivaka!

Oho, ku khuluka ku sasekile
 Loku ku ndzi endlaka ndzi basa tani hi
 gamboko;
 Ku hava xihlovo xin'wana lexi ndzi xi tivaka,
 A ku na xin'wana handle ka Ngati ya Yesu.
 Ku ni Xihlovo lexi nga tala hi Ngati,
 Lexi humaka eminsiheni ya Immanuel,
 Laha vadyohi va nga nyupela endzeni ka
 ndhambhi,
 Ku suka hinkwaswo swinaka swa nandzu wa
 vona.

¹²⁶ Ndza mi byela, kuhava xihlovo xin'wana lexi ndzi xi tivaka handle ka Xihlovo xexo. Xi ndzi hlantswile loko ndza ha thyakile. Xi ndzi endla leswaku ndzi tshama ndzi basile, hikuva ndzi lava ku hanya eka Xona, ndzi nwa Mati lamo tenga lama tataka moya wa mina hi ntsako.

Ndzi nga kumeka ndzi tsanile swinene, ndzi tlhela ndzi titwa leswaku hi ku tika ndzi nga ha tsandzeka ni ku famba . . . ku ya eka rhengu rin'wana, ndzi nga swi koti ni kuya kun'wana; swingaleswi ndzi nga ha nkhsinsama ehansi ndzi tchandleka rintihlo ra mina eka xitshembhiso, ni ku, "Hosi Xikwembu, Wena la nga matimba ya mina. Wena la nga ku eneriseka ka mina. Wena la nga hinkwaswo eka hinkwaswo swa mina." Ndzi nga ha sungula ku twa Swin'wana leswi swi ndlaka swithomuthomu endzeni ka mina lahaya. Ndzi huma eka swona.

¹²⁷ Tani hi laha ndzi hundzeke makume ntlhanu wa malembe, ndzi ta pfuka ni mixo, ma swi tiva leswi nga xiswona, a mi nga swi koti hi ku tika ku susa nenge walowo wun'we emubedweni. Mina, swi ta mi nononhwela ku swi endla; kutani un'wana erivantini, a gongondza, kumbe Billy a ndzi byela leswaku ku ni swa xihatla, kun'wana laha ndzi fanelaka ku ya. Kutani ndzi ehleketa, "Xana ndzi nga swi endla njhani xana?" Ndzi ringeta ku humesa nenge wun'we.

Ndzi ehleketa, "Wena u Xihlovo lexi tatiweke hi matimba ya mina. Amen! Matimba ya mina ni ku pfuna ka mina swi huma eka Hosi. Wena la nga xihlovo xa mina lexi pfelelaka! Wena la nga vuntshwa bya mina! 'Lava va rindzelaka Hosi va kuma matimba mantshwa; va ta haha hi timpapa ku kotisa gama; va ta tsutsuma, va nga karhali; va ta famba, va nga tali.' Hosi Xikwembu, lowu i ntirho wa mina, wa ku famba. Ndzi vitaneriwile exivandleni xa ntirho." Kutani nchumu wun'we mi wu tivaka, Swin'wana swi sungula ku endla xithomuthomu endzeni ka mina.

128 Siku rin'wana, exindzhawanani, a ndzi ri na nhlengeletano lahawani eTopeka, Kansas; a ku ri ni jaha, muchumayeri lontsongo, un'wana wa vaseketeri va mina lavo rhanga. Makwerhu Roy, u tshamile kwala, wa ti tsundzuka ti ndzhawu ta kona. Eka leyi, eka ndzhawu leyi leyikulu kwalahaya, a ku ri ni—ni. . . Muministara loyi a ri ehansi ka lwangu kumbe ndzhawu, khumbi ri n'wi werile ri n'wi faya ehansi ka rona. Nakulorhi lontsongo a ya eku feni. Xivindzi xa yena a xi bulukile. Rivengo ra yena a ri hlomukile endzhawini ya rona. Ti thani ti n'wi wela.

129 A ndzi tshamile eku fihluleni, ndzi ri karhi ndzi vulavula na nsati. Ndzi ku, "Nsati, wa swi tiva, loko Yesu a ri lahawani, wa swi tiva leswaku A ta endla yini xana?" Ndzi ku, "Loko a ndzi seketerile, 'ndzi pfumela Rito lero,' a ri ku seketeleni ka Kreste." Kutani ndzi ku, "Xexo xa va xirimani xa javulosi." Ndzi ku, "Loko Yesu a ri kona lahawani, A ta ya a ya tlhandleka mavoko ya Yena lamo kwetsima ehnhla ka yena. Jaha lero a ri ta hanya. A ndzi na mhaka ni leswaku xivindzi xa yena a xi bulukile. A ta hanya, hikuva Yesu a nga ha famba endzeni kwalahaya a ri karhi a switiva leswaku hakunene hi Yena Mani. A tiva ku vitana ka Yena, Matsalwa a ma ri kahle, ma ri karhi ma tiyisisa eka Yena leswaku a ri Yena Mani, nakona ku nga ri. . . ku nga ri na ndzhuti wa ku kanakana. A ta tlhandleka mavoko ya Yena ehnhleni ka yena, a ku, 'Jaha, hanya,' huma u famba kwalaho." Kutani ndzi ku, "A ku na madimoni lama ringaneleke etiheleni ku dlaya jaha lero, kwalaho." Ndzi ku, "U ta hanya." Kambe ndzi ku, "Wa swi vona, nkatanga, A ri Yesu, mavoko lamo kwetsima ya Xikwembu."

Ndzi ku, "Ndzi mudyohi. Ndzi tswariwile hi ndlela ya masangu. Tatana na manana wa mina ha vumbirhi a va ri vadyohi, kutani ntsena a ndzi lonene."

Kutani ndzi ku, "Kambe wa swi tiva leswaku i yini? Loko Hosi yi nga ndzi nyika xivono ni kuva yi ndzi rhuma ehansi lahaya, swingaleswi sweswo swi tava swi hambanile." Ndzi ku, "Ndzi ta rhelela ni ya n'wi tlhandleka mavoko, u ta pfuka eka mubedwa walowo loko Xi nga ndzi nyika xivono."

130 Swingaleswi ndzi ehleketile leswaku, "Endzhaku ka hinkwaswo, loko a xi ri xivono, xana a ku ri yini xana? A ya ri mavoko ya lawaya yo thyaka eka yena, a-ha, munhu ya luya a n'wi khongelelaka, mavoko ya lawaya yo thyaka."

Swingaleswi ndzi sungurile ku ehleketa, "Ndzi muyimeri wa Yena. Swingaleswi, Xikwembu a xi ndzi voni. Ngati yaleyo ya Loyi a lulameke yi le henhla ka altari kwalahaya; ya ndzi khongelela. Hi Yena ku eneriseka ka mina. Hi Yena xikhongelo xa mina. Hi Yena Vutomi bya mina. Ndzi ku, "Nchumu wun'we lowu wu endlaka ndzi n'wi tlhandleka mavoko, hi

ripfumelo, hikuva ndzi vile ni ripfumelo exivonweni. Kutani ehandle ka xivono, ripfumelo rona rero ri nga ha endla swo fana; swingaleswi ndzi nga ha tivula leswaku a ndzi nchumu hi vumina, kambe ku N'wi vula hinkwaswo eka hinkwaswo swa mina. Hi Yena Vutomi bya mina. Hi Yena Mulerisi wa mina. Ku hava dinominexini leyi yi nga ndzi rhuma; U ndzi rhumile. Haleluya! Ndzi famba hi Vito ra Yena. Ndzi ta n'wi thandleka mavoko.” Ndzi rhelela ehansi ndzi ya thandleka mavoko eka jaha lero, nakona vusiku byebyo a ri exikhongelweni, lexi tiyeke. Amen!

¹³¹ Oho, ina, hi Yena Xihlovo xexo. “Ku hava xihlovo xin'wana lexi ndzi xi tivaka. A ku ni xin'wana handle ka Ngati ya Yesu!” Ndzi la nunhwaka, ndzi mugwinihi, un'wana na un'wana wa hina hi tano, kambe emahlweni ka Xikwembu hi lava hetisekeke. Ye-... “Hikwalaho hetisekani, ku kotisa Tatana wa n'wina wa le Tilweni a hetisekeke.” Xana mi nga hetiseka njhani xana? Hikuva Loyi a hetisekeke u hi yimerile kwalahaya. Xihlovo xexo xi kona masiku hinkwawo, xi tengile. Ku nga ri swin'wana swa mati lama yimeke, kambe ma ri lama nga tenga masiku hinkwawo, lama ya hlatswaka swidyoho swa mina hinkwaswo. Hi Yena Xihlovo xexo.

¹³² Sweswi hi ku pfala, ndzi nga ha vula leswi. Swin'wana ni swin'wana leswi hambanaka na Lexi i swihlovo leswi handzukeke, kutani ekuheteleleni swi ta pfutisa leswi mi nga swi chela; loko mi ngenisa ku tshembha ka n'wina hinkwako, nkarhi hinkwawo wa n'wina, ni hinkwaswo, eka xin'wana xa swihlovo swa mati lama yimeke. Yesu u teri i swihlovo leswi handzukeke. Xikwembu xi teri, “Swi handzukile, nakona swi ta pfuta swi huma hinkwaswo leswi mi swi ngeniseke eka swona.” A mi nga yi ekule naswona, hikuva swi ta pfuta. Hikuva hi Yena ntsena ndlela ya Ntiyiso, ya Vutomi, ni kuya eka ntsako lowu nga Heriki, niku rhula loku nga Heriki. Hi Yena a ri Yexe ntsena ni ndlela yi ri yoxe ya Sweswo. Oho, mina!

¹³³ Xihlovo lexi nga hlakaleki xa Vutomi i Yesu Kreste. Hikokwalaho ka yini xana? Nakona xana Yena i Mani? I Rito, leri fanaka; Rito, Vutomi, Xihlovo, “hi yena tolo, namuntlha, ni hilaha ku nga heriki.” Mupfumeri wa ntiyiso, hi Rona ntsako lowukulu wa yena, Vutomi lebyikulu bya yena. Ni ku eneriseka lokukulu ka yena ku le ka Kreste. A ku pompiwi, a ku kokiwi, a ku joyiniwi, a ku khapiwi; ntsena ko pfumeriwa niku wisa. Sweswo hi leswi A nga xiswona eka lava pfumelaka.

¹³⁴ Kufana ni tatana Abraham; a nga kalanga a koka, a nga kalanga a tshikeleleka, a nga kalanga a vilela. A ri na Rito. A tshamile exifiveni xa El Shaddai. Loko Abraham a ha ri ni malembe ya dzana hi vukhale, Xikwembu xi tivonakarisisile eka yena, kutani xi ku, “Ndzi wa Matimba hinkwawo.” Hi rito ra Xiheveru i *El Shaddai*, leswi vulaka, “Loyi a nga Xifiveni.”

“Kutani u khalabyile, ni matimba wa ha ri hava, kambe ntsena etlela exifuveni xa Mina kutani u wundla matimba ya wena eka Xihlovo lexi.” Amen! Xana a ti wundlela yini xana? Miri lowu ntshwa. A ri ni n’wana, ha Sara. Kutani, endzhaku ka malembe ya makume ntlhanu, u vile ni vana va nkombo ni wansati un’wana.

¹³⁵ Oho, El Shaddai! Testamente ya Khale yi kombisa leswi A swi endleke, Testamente leyi Ntshwa yi hi byela leswi A nga ta swiendla. Amen! Eka Testamente ya Khale . . .

¹³⁶ Moya wu hundzile sweswi, swingaleswi ndzi ta hatlisa ndzi ta tlula leswi lahawani sweswi, ntsena xinkadyana.

Ndzi tsakela ku vula leswi ndzi nga si ya pfala. Ndzi vile ni xikombiso xa kahle siku rin’wana. A ndzi ri ku valangeni. Kutani vanhu votala lahawani. . . Ehansi eGeorgetown, ehansi lahaya eMilltown, kwalahaya a va toloverile, endzhaku eswigangeni, exihlobyeni. A xi ri xihlovo lexi pfelelaka. Xi humesa kwalomu ka—ka mune—kumbe ntlhanu wa magoza wa mugero wa mati, ntsena a matlhambuka ya huma minkarhi hinkwayo, ni xihlovo lexikulu lexi nga kwalahaya. Nakona ku rhendzeleka hi xona a kuri na musundzwani wo tala lahawani, ma swi tiva, ni swin’wana leswi a swi mila kwalahaya, leswi a swi fana ni musundzwani. Kutani, oho, loko ndzi ri na toraha ndzi toloverile ku ya kwalahaya, oho, mina, ku ya exihlobyeni xexo. Kutani ndzi nkhisamile eka xona ntsena ndzi nwa niku nwa, kutani ndzi tshama ehansi ndzi nwa, rindzelani.

Kutani lembe rin’wana ni ri n’wana ndzi ta ta eka xihlovo xexi. A xi kalanga xi hundza, hi vuxika kumbe hi ximumu. Swi ngaka swi nga xigwitsirisi. Mi ngaka mi nga swikoti ku gwitsirisa xihlovo lexi pfelelaka. Oho, ee! Oho, ee! A ndzi na mhaka ni leswaku—leswaku xi kuma ku titimela ka njhani, swi ngaka swi nga xigwitsirisi sweswo. Mi nga ha gwitsirisa xihlovo; ntsena gwitsi nyana ri nga swi endla sweswo. Wa vona?

Kambe xin’wana ni xin’wana lexi xi fambaka, xi ni Vutomi eka xona, xi famba hinkwako. Kutani mi ngaka mi nga swikoti ku gwitsirisi Xihlovo lexi pfelelaka. Swi nga ri na mhaka leswaku moya wo tshikelela wu njhani endhawini, Xihlovo lexi hi lexi hanyaka minkarhi hinkwayo. Hanyani eXihlobyeni xexo.

¹³⁷ Kutani ndzi xiyisisile kwalahaya, ndzi hundzile hi kwalahaya ndzi ya nwa eka xona, kutani, oho, mina, ntsena mati lamo tenga! A mi fanelanga mi vilela, “Ndzi nga hlamala, loko ndzi nga fika kwalahaya, swi nga hmarisa loko xi yime ku khuluka?” A xi ri eku khulukeni . . .

¹³⁸ Kutani n’wamapurasi wa mudyuhari, u teri, “Kokwana wa mina a nwa eka xona.” Kutani a ku, “A xi kalanga xi hunguteka kumbe swin’wana. Xa ha ri xihlovo xexiya, xi karhi xa humesa maboboma ya khulukela kwalahaya eBlue River.”

¹³⁹ Ndzi ehleketa, “Oho, mina, i ndzhawu ya kahle njhani ya mati!” Ndzi nga ha famba kwalomu ka mayili ndzi sukile endleleni, ku ya endzhawini yaleyo, hikuva a yi ri ndzhawu ya kahle ku nwa eka yona. Oho, a ya ri kahle njhani mati yalawa! Oho, mina!

Ndzi nga—ndzi nga ha huma kwalaho eka mananga walawo, Arizona sweswi, ndza ha ehleketa ha xona na sweswi, “Xihlovo xexo xo saseka lexi nga lahaya, loko ntsena ndzi nga xi nkhisamela!”

Tani hi Davida nkarhi wun’wana a nge te, “Oho, loko ndzi nga ha nwa nakambe eka xihlovo xexo!” Loko a nga ha ta kwalahaya!

¹⁴⁰ Kutani ndzi tshamile ehansi siku rin’wana, kutani ndzi vile ni matwele lawa ya nga riki kahle eka mina. Hiloko ndzi ku, “Xana i yini xi endlaka leswaku u tshama u tsakile minkarhi hinkwayo xana? Ndzi navela i ngaku ndzi nga tsakisa xisweswo. Hikokwalaho ka yini, a ndzi kalanga ndzi ku vona u terisa vusiwana, kusukela loko ndzi ta lahawani. Ku hava na nchumu na wun’we lowu wu nga wa vusiwana.” Ndzi teri, “U tshama u tele hi ntsako minkarhi hinkwayo. Wa tlula-tlula ni ku humesa xithomuthomu ni kuya emahlweni. Xixika kumbe ximumu, ku titimela kumbe ku hisa, hambu ku nga va yini, mi nkarhi hinkwayo mi va mi tele ntsako. I ncini leswi swi...? Yini, xana i yini? Hikuva ndzi nwile eka wena xana?”

“Ee.”

Ndzi ku, “Kunene, kumbexani mimpfundla yi nwa eka n’wina, nakona mi swi rhandzisa xisweswo.”

“Ee.”

Ndzi ku, “Kunene, i yini lexi xi ku endlaka u va na xithomuthomu xo tani hi xexo xana? Xana i yini lexi xi ku tsakisaka xana? Xana i yini lexi xi ku endlaka u tshama u tele hi ntsako xana?” A ku, “Swi endlaha hikuva—hikuva swinyenyana swi nwa eka wena xana?”

“Ee.”

“Hikokwalaho ka kuva ndzi nwa eka wena xana?”

“Ee.”

Ndzi ku, “Kunene, xana i yini lexi xi ku endlaka u tshama u tele hi ntsako xana?”

¹⁴¹ Kutani loko xihlovo xexo xi nga kota ku ndzi hlamula, a xi ta vula leswi. “Makwerhu Branham, ku nga ri hi ku wa nwa; ndza swi amukela sweswo, ni hikokwalaho ndzi nga phamelaka tinenyana. Ndzi phamela un’wana ni un’wana loyi a lavaka ku nwa. Nchumu wun’we ntsena lowu mi nga wu endlaka i ku ta lahawani mi ta nwa. Kambe, lexi xi ndzi endlaka ndzi tsaka,

a hi mina ndzi va ka ni xithomuthomu, hi swin'wana leswi nga endzeni, swi ndzi sukumetaka. Hi swin'wana swi endlaka xithomuthomu eka mina.”

¹⁴² Kutani swi hi ndlela yaleyo ni vutomi lebyi byi ta tiweke hi Moya. Kukotisa loko Yesu a te, A ri e. . . Wa vona, U mi nyika swihlovo swa mati lawa ya endlaka swithomuthomu kuya fika eka Vutomi lebyi nga heriki, leswi pfelelaka, leswi swi khulukaka hi ku tlhambuka swi khuluka swi nga yimi. Hambi kereke hinkwayo yi le henhla kumbe ehansi, hambu swi ri tano ma ha ri eka Xihlovo xexo.

Hikokwalaho ka yini mi teka mafambiselo ya khale ya xidinominexini na xihlovo, lexi nga tala hi tipharasayiti ni hinkwaswo, kutani mi nwa eka swilo sweswo swa mati lama yimeke, loko mi rhambile eXihlobyeni, Xihlovo lexi pfelelaka?

¹⁴³ Ntsena ndzi ehleketa hilaha xisukumetaka ha kona, ni masalamusi, ni—ni ku tlhambuka, ni ku hleka, ni ntsako, niku tlula—tlula, ni ku hlekisa. Ku titimela, mpfula; ku hisa, ku phya, loko tiko hinkwaro ri omile, ntsena a xi humesa xithomuthomu tani hilaha xi swi endlaka minkarhi hinkwayo. Hikuva xi entile, xi va ni timintsu, kusuka ehansi emaribyeni xi huma eka wona.

¹⁴⁴ Oho, mi nge ndzi hanya hi ku Tlhambuka kwaloko! Tekani mafambiselo lawa ya nga endla hi munhu lawa mi ya lavaka, hinkwaswo swihlovo swa n'wina swa khale swa mati yo yima, kambe mi nge mina ndzi ta. . . kumbe swihlovo swa mati lama yimeke. Kambe, mi nge mina ndzi ya eka Xihlovo lexi, mi nge mina ndzi ya laha Xi nga tala. Hi Xona Ntsako wa mina. Hi Xona Rivoni ra mina. Hi Xona—hi Xona Matimba ya mina. Hi Xona Mati ya mina. Hi Xona Vutomi bya mina. Hi Xona Muhanyisi wa mina. Hi Xona Muponisi wa mina. Hi Xona Hosana ya mina. Hinkwaswo leswi ndzi swi lavaka swi kumeka eka Xona. Hikokwalaho ka yini ndzi fanele kuya eka xin'wana xana?

¹⁴⁵ Buti, sesi, a mi swilavi ku ta eXihlobyeni lexi vusiku lebyi xana? A mi swi lavi, loko kuruku a wu se tshama u va kwalahaya, a mi swilavi ku Xi amukela vusiku lebyi loko ha ha korhamisa tinhloko ta hina xana?

¹⁴⁶ Swihlovo leswi handzukeke, leswi pfutaka, swa makhukhuri, makhukhuri ya misava ya nghena eka swona, thyaka leri humaka emadulwini ni ya masiku man'wana. Hikokwalaho ka yini mi nga ti eka Xihlovo lexi, swilo sweswo swi ngaka swi nga tshami endzeni, ka Xihlovo lexikulu lexi tatiweke hi Ngati, leyi humaka eminsiheni ya Emanuel xana? Hikokwalaho ka yini mi nga xi amukeli vusiku lebyi xana? I ngaku Xikwembu xi nga hi pfuna vusiku lebyi, etikweni leri ro oma, ni torha. Tani hilaha muprofeta a nge te, “Hi Yena Ribye etikweni leri karhaleke.” Hi Yena Xihlovo xexo. A mi nge ti eka Yena vusiku lebyi, etimbilwini ta n'wina, loko ha ha khongela xana?

¹⁴⁷ Eka Tatana wa le Matilweni, ku hava Xihlovo xin'wana, tani hiloko vunanga byi ri eku chayeni, "A ku na xihlovo xin'wana lexi ndzi xi tivaka; ku hava xin'wana handle ka Ngati ya Yesu." Ndzi tswaleriwile kwalahaya, ndzi kurisiwilele kwalahaya; ndzi lava ku hanya kwalahaya, niku fela kwalahaya, niku pfuka nakambe kwalahaya, eVukoneni bya Yena. Minkarhi hinkwayo, Hosi, ndzi pfumelele ndzi va eVukoneni bya Yena, hikuva ku hava xin'wana lexi ndzi xi tivaka. Ku hava mikhuva, ku hava rirhandzu; ku hava rirhandzu kambe Kreste, ku hava mikhuva kambe Kreste, ku hava buku kambe Bibebe, ku hava nchumu, ku hava ntsako lowu nga ehandle ka Yena. Ku N'wi susa eka mina, O Xikwembu, a ndzi na mhaka ni leswaku i misava yo tarisa ku yini ndzi yi fumaka, yi—yi ta tama ya ha file, ndzi nga ha rhendzeleka ndzi rhwale mavoko enhlokweni ya mina. Ku N'wi susa eka mina, ndzi tava ndzi fambile, Hosi. Kambe N'wi pfumeleri a va eka mina, swingaleswi N'wendzambahala yi tsakisa kufana ni Mudyaxihi, swingaleswi a ku na tindzhawu leti hisaka ku hava ni tindzhawu leti omeke, hambu ri ri rifu hi roxe a ri na kuhlula. Hi nyike Yena, Tatana. Hi nyike Yena, hi ntalo, eka mupfumeri un'wana ni un'wana vusiku lebyi lahawani, tani hiloko va rindzerile ekamareni leri.

¹⁴⁸ Lavo tala va vona va fanela ku chayela emagondzweni vusiku lebyi, tani hiloko va tlhelela emakaya ya vona, kutani i ngaku leswi swi nga va emiehleketweni ya vona, "Ndzi le ku hanyeni eXihlobyeni xexo. Ndzi le ku hanyeni kwalahaya, ndzi ri ku nweni mati lama tengeke, awara ni awara."

¹⁴⁹ Kutani loko va nga swi amukelanga sweswo, hambu swi ri tano, va nga ha N'wi amukela sweswi, swingaleswi va nga ha ti tekela Xihlovo va va na xona. "Ndzi ta famba na wena; Ndzi tava na wena ku fika emakun'wini ya misava." Hi nyike swilo leswi, Tatana.

¹⁵⁰ Kutani sweswi loko ha ha korhamisile tinhloko ta hina, ku nga va kuri na un'wana lahawani, vusiku lebyi, kumbe i vangani lava va nga ta ku, "Hosi, ntsena ndzi yise eka Xihlovo xexo sweswi. Ntsena a ndzi tanga lahawani ku ta yingisela ntsena; ndzi tile lahawani ku ta kumisisa Swin'wana. Ndzi tile lahawani ku ta kuma Wena, Hosi. Ndzi ni xilaveko xa Wena vusiku lebyi. Nghena embilwini ya mina sweswi. Xana u ta swi endla, Hosi?" Xikwembu a xi mi katekisi. Hosi a yi katekisi un'wana ni un'wana.

¹⁵¹ Tatana, U ya vonile mavoko, hambu ku ri ehenhla ni ku rhendzeleka hi khumbhi, nile ka ti kamara tin'wana, ta le handle. U—U va vonile, Tatana. Ndza—ndza khongela leswaku U ta va nyika hinkwaswo leswi va nga na swi laveko na swona. Kumbexana a va nwa eka xihlovo xin'wana xa khale, Hosi, ntsena ku yima kun'wana empfhukeni laha vanhu van'wana

va nga ti handzela xihlovo, xi kumeka xi nyamisiwa hi tinxaka hinkwato ta tidyondzo leti chavisaka, va landzula Rito. Ndza khongela, Xikwembu, leswaku vusiku lebyi va tata eka Yena Loyi a nga Xihlovo xexo, Xihlovo xexo xa Vutomi. Hi nyike swona, Tatana. Ndzi va tisa eka Wena sweswi hi Vito ra Yesu.

¹⁵² Kutani U ndzi byerile leswaku, “Loko hi kombela xin’wana ni xin’wana hi Vito ra Mina, swi ta endliwa.” Sweswi, a ndzi nga kombeli leswi, Hosi, loko ndzi nga ehleketi leswaku swi ta endliwa. Ndzi tava—ndzi tava ndzi swivula hi ndlela ya magandzelelo. Kambe ndza va khongelela, hi ku tshembheka. Ndza va khongelela, ndzi ri karhi ndzi pfumela leswaku U ta tiyisisa leswi U swi tshembhiseke.

¹⁵³ Kutani sweswi ndzi va susa eka xihlovo xexo vusiku lebyi. Ndzi va susa endzhawini leyi a va nwa eka yona, laha a va nga eneriseki; ndzi va tisa eka Xihlovo lexi. Ndzi endla leswi hi Vito ra Yesu Kreste.

¹⁵⁴ I va Wena, Hosi. Va pfumeleli va nwa eka Wena, Mati lama pfelelaka, Xihlovo xa Mati lama pfelelaka. Hi Vito ra Yesu, ndza swi kombela. Amen. Hi nyike swona, Hosi.

Oho, ku saseka i ku khuluka kwaloko
Loku ku ndzi basisaka kufana ni gamboko;
Ku hava xihlovo xin’wana ndzi xi tivaka,
Ku hava handle ka Ngati ya Yesu.

I ncini lexi nga basisaka vudyoho bya mina?
Ku hava handle ka Ngati ya Yesu;
I ncini lexi xi nga ta ndzi hetisekisa nakambe
xana?

Kuhava handle ka Ngati ya Yesu.

O Yesu, va hanyisi, Hosi! Hi nyike swona, Hosi, hi Vito ra Yesu. Ndza khongela, Xikwembu, leswaku U...?. . .Wena u tivaka hinkwaswo.

Ku hava xihlovo xin’wana ndzi xi tivaka,
Oho, ku hava handle ka Ngati ya . . .

¹⁵⁵ Ehleketani ha swona, ku hava xihlovo xin’wana ndzi xi tivaka! A ndzi tivi nchumu swin’wana handle ka Yena. A ndzi tsakeli ku tiva nchumu swin’wana handle ka Yena. Ku hava nchumu handle ka Ngati ya Yesu! Oho!

Oho, ku saseka i ku khuluka kwaloko
Loku ku ndzi basisaka kufana ni gamboko;
Ku hava xihlovo xin’wana ndzi xi tivaka,
Oho, ku hava handle ka Ngati ya Yesu.

¹⁵⁶ Loko ha ha ri yimbelela nakambe, a hi tlhavulaneni. Xana ma rhandzana xana? Xana ku ni un’wana loyi a nga niku lwisana ni un’wana xana? Loko a ri kona, fambani mi ya swi lulamisa. Mi ta swi endla xana? Mi nga humi lahawani mi ri xisweswo. Wa vona? Loko mi fanele ku swi endla ni un’wana,

fambani mi ya swilulamisa, sweswi. Sweswi i nkarhi wa n'wina wo ya emahlweni, mi ku, "Buti, sesi, ndzi vule swin'wana ha wena, a ndzi ehleketa swin'wana. A ndzi nga vuli ku swi endla. Ndzi rivaleli." Wa vona, ya leyo hi yona ndlela yo swi endla. A hi veneni na Xihlovo exikarhi ka hina, nkarhi hinkwawo. Wa vona?

Ku hava xihlovo xin'wana ndzi xi tivaka,
 Ku hava handle ka Ngati ya Yesu.
 Oho, ku saseka i ku khuluka kwaloko
 Loku ndzi basisaka kufana ni gamboko;
 Oho, ku hava xihlovo xin'wana ndzi xi tivaka,
 Ku hava handle ka Ngati ya Yesu.

¹⁵⁷ Oho, xana A nga sasekanga xana? Ku hava xihlovo xin'wana! Hi ngaka hi nga tinyamisi hi swin'wana. Hi tihambanyisile, hi siya misava endzhaku. A ha ha lavi ticaliki ta Egipta ni swihlovo leswi handzukeke. Hi le rendzweni na Hosi Yesu, Ribye lero ri biweke, amen, hi dya Mana lawa ya humaka Ehenhla, niku nwa; hi dya Swakudya swa tintsumi, ni ku nwa eRibyeni. Amen!

Ku hava xihlovo xin'wana ndzi xi tivaka,
 Ku hava handle ka Ngati ya Yesu.

A hi korhamiseni tinhloko ta hina sweswi.

¹⁵⁸ Hi khongela leswaku Xikwembu xi ta mi katekisa un'wana ni un'wana wa n'wina, leswaku tintswalo ta Yena ni ntwela-vusiwana swi va na n'wina evhikini leri taka. Kutani loko swin'wana swi nga humelela, leswaku un'wana wa n'wina a nga rhetemukela eka xifunengeto sweswi, ntsena tsundzukani leswaku i tiawara tintsongo ta ku etlela niku wisa ku kondza hi hlangana. Tsundzukani, leswaku, "Lava va hanyaka ni lava saleke va ngaka va nga rhangeli lava etleleke, eka Nanga ya Xikwembu, Mhahamhala yaleyo yo hetelela . . ." Ntsena ya vuntsevu yi ririle. Kutani Mhahamhala ya leyo yo hetelela, tani hi Xilemo xo hetelela, kutava kuri ku Vuya ka Hosi. "Yi ta yimbiwa, kutani lava feleke eka Kreste va ta sungula va pfuka." Ntsena wisani ku fikela nkarhi walowo.

¹⁵⁹ Kutani loko mi vaviseka, tsundzukani:

Tekani Vito ra Yesu ri va na n'wina,
 Tani hi xisirhelelo eka swirimhana
 hinkwaswo;
 Kutani loko miringo yi mi rhendzela,
 Ntsena hefemulani Vito lero ro kwetsima eka
 xikhongelo. (Madimona ya ta famba.)

¹⁶⁰ Ntsena tsundzukani, hi niku tshembha ka leswaku hi ta hlangana na n'wina kwalahawani hi Sonto lowu wu landzelaka ni mixo. Tisani lava vabyaka ni lava va

xanisekaka. Ndzi ta mi khongelela. Mi ndzi khongelela sweswi. Xana mi ta swi endla? Mi nge, “Amen.” [Nhlengeletano yi ku, “Amen.”—Muhleri.] Ndzi ta mi khongelela, leswaku Xikwembu xi ta mi katekisa.

. . . Vito exikhongelweni.

Vito lero saseka, Vito lero saseka, O ri kahle!

Ku tshembha ka misava ni ntsako wa Tilo;

Vito lero saseka, O ri kahle!

Ku tshembha ka misava ni ntsako wa Tilo.

Hi Vito ra Yesu hi korhamisa tinhloko,

Hi wa hi ku karhala emilengeni ya Yena,

Hosi ya tihosi eTilweni hi ta N’wi ambexa
hari,

Loko rendzo ra hina ri herile.

Vito lero saseka, Vito lero saseka, (xana a ri
kahle niku saseka xana?)

Ku tshembha ka misava ni ntsako wa Tilo;

Vito lero saseka, Vito lero saseka, O ri kahle!

Ku tshembha ka misava ni ntsako wa Tilo.

¹⁶¹ Swa nonohwa hi minkarhi hinkwayo ku mi sukela. Handle ka loko ndzi swi tiva leswaku mantshwa, kambe ntsena ku ni swin’wana hi. . . A hi, engeteleni vhesa ya swin’wana, xana mi ta swi endla xana? [Nhlengeletano yi ku, “Amen.”—Muhleri.] Xana mi ta swi endla xana? *Ku Katekile Ku Bohiwa Ka Leswi Boheke*, sesi. Xana i vangani va ri tivaka risimu ra khale xana? A hi toloverile ku ri yimbelela, malembe lama nga hundza.

¹⁶² Kutani a ndzi ri ku ehleketeni, vusiku lebyi, “mavoko mambirhi, ehenhleri ka madzana, ya lava va saleke,” loko ha ha toloverile ku yimbelela risimu lero etabernakeleni, kutani voko rin’wana ri khoma voko ra un’wana. *Ku Katekile Ku Bohiwa Ka Leswi Boheke*. Ndzi lahlile vo tala va vona, kwalahawani eswilahlweni. Va rindzerile. Ndzi tava vona nakambe. Ndza va vona, kan’we hi xinkadyana, eka xivono, loko ndzi languta endzhaku ka khethenisi. Va kwalahaya.

A hi korhamiseni tinhloko ta hina sweswi tani hiloko ha ha yimbelela.

Kukatekile ku bohiwa ka leswi boheke

Timbilu ta hina erirhandzwini ra Vukreste;

Xinakulobyé. . .

Xi fana ni sweswo swa le Henhla.

Loko hi. . .

Sweswi tshunelelelani mi khomana hi mavoko.

. . . hi tlhelo rin’wana ra ku hlaya,

Sweswi korhamisani tinhloko ta n’wina.

Ri hi nyika xitlhavi lexi xi yaka emahlweni;
 Kambe hi ta tama ha khomanile etimbilwini,
 Ni ku tshembha leswaku hi ta hlangana
 nakambe.

¹⁶³ Ha ha korhamisile tinhloko ta hina. Ndzi hundzisela
 xikhongelo eka mufundhisi sweswi, ni ku hi ntshuxa eka . . . 

SWIHLOVO LESWIHANDZUKEKE TSO64-0726E

(Broken Cisterns)

Hungu leri hi Makwerhu William Marrion Branham, ri sungurile ri hangalasiwa hi Xinghezi hi Sonto ni madyambu, Mawuwani 26, 1964, eka Tabernakele ya Branham eJeffersonville, Indiana, U.S.A., ri tekiwile kusuka eka nkandziyiso wa thepi ya maginetiki kutani yi tsariwa yi nga khomananga hi Xinghezi. Hundzuluxo lowu wa Xitsonga wu tsariwile wu hangalasiwa hi Voice Of God Recordings.

TSONGA

©2014 VGR, ALL RIGHTS RESERVED

VOICE OF GOD RECORDINGS, SOUTH AFRICA OFFICE
 P.O. Box 178, SOMERSET WEST, 7129 CAPE PROVINCE,
 REPUBLIC OF SOUTH AFRICA

VOICE OF GOD RECORDINGS
 P.O. Box 950, JEFFERSONVILLE, INDIANA 47131 U.S.A.
www.branham.org

Xitiviso Xa Mpfumelelo Wo Kopa

Timfanelo hinkwato ti hlayisiwile. Buku leyi yi nga ha kandziyisiwa hi printara yale kaya leswaku munhu a ti tirhisela kumbe ku yi phakela, yi nga hakerisiwi, tani hi xitirhi xo hangalasa Evhangelu ya Yesu Krete. Buku leyi a yi xavisiwi, yi humesiwa hi xikalo lexikulu, yi vakeriwa eka “website,” yi hlayisiwa eka tisisiteme leti ti nga swi kotaka kuva yi tekiwa, yi hundzuluxeriwa eka tindzimi tin’wana, kumbe yi tirhiseriwela eka nkwama lowu wu nga pfumeleriwa handle ka nhlamuselo leyi yi nga tsariwa ya ku pfumeleriwa hi Voice Of God Recordings®.

Vuxokoxoko byo tala kumbe nhundzu yin’wana leyi yi nga kona, mi komberwa ku ti hlanganisa na:

VOICE OF GOD RECORDINGS
P.O. Box 950, JEFFERSONVILLE, INDIANA 47131 U.S.A.
www.branham.org